

Kayëte Wapuyala ña Wade yehëhna hnë inji kayëte

Hnë anji kayëte Wënu ña njëtëndanëka ale herëk a, mpëdara Afayik San, viyë vile rëfëka tëki ryënkwëhniđ iboka Këris. Kerik yëbëlan bëhn wafëhw imbëđ gë wahi gë bëhn wafëhw imbëđ gë wahnah g'imbëđ (70 gë 95) ga ndëcëk nagi Yesu ÿa hnë wati nte korotehnëđëho cery sali ña.

Anji kayëte nësëđ viyi viyabah vile fëhnëtanëk viyë vihawary soñe bulunda wasëwif. Mbëđ gë wahi fëhnëtanëk ile fadëk ÿa. Nëm̄p yah ÿa fëhnëtanëk imëk inja do fëna ufacah wã. Nkol Babilon ña fëhnëtanëk Rom; hnë vanji vankol nke ucankaf meh.

Kayëte ña pëgwëhnanik gë wanës soñe vacery sali mbëđ gë vaki hnë vacery sali vambë Asi hna. Ile rëfika ÿa kayëte hna, San njojik ambin hna hn'ile nuk toyë fo ile liyađ ÿa hnë wapuyala ðuniÿa li ante mbokajëđ Yesu ña: ðuniÿa ÿi përekanëđe, Sintani ÿa këfëde, kitiñ tëkwa ña nkeđ, do Yesu ntañad tinki ahnañ hnë Yerusalem kasëk hna.

Wëlin wanës wakwëhn nafa hn'inji kayëte: mëleka, ahnañ, kayëte, fape, hwëđëh, ambin, kopa, uwám.

Wëlin gante nke kayëte ka:

Simpayi (1.1-8)

Yesu cahnanika San (1.9-20)

Kayëte soñe vële hwëtahnek ye hnë vankol
 mbëd gë wahi hna (2.1–3.22)
 Icëmb ña ambin hna (4.1–11)
 Fape fa gë kayëte nte ÿamëndëlehnik
 wahwënta imbëd gë wahi (5.1–8.2)
 Walënkwa mbëd gë wahi gë wahitiñ walëw hni
 (8.3–11.19)
 Vëyëw Wën mëkëden (12.1–14.20)
 Wamëleka mbëd gë wahi gë wëkata wã (15.1–
 16.21)
 Iyo Babilon (17.1–18.24)
 Imëk gë kitiñ tëkwa (19.1–21.8)
 Yerusalem kasëk (21.9–22.21)

Uyëtëndan: ile njëtëndanëka Wënu ña San

¹ Hn'añi kayëte nke viyë vile cowëtëk Yesu Këris. Wënu ña njëd'akawo soñe njëtëndanëhni vëyohal vëlëwu va vile rëfëka tëki hara biyëna ÿa. Këris ÿa payëkawo mëleka lëwu ÿa ÿal mën, ami San ayohal alëwu, soñe njëtëndano virac. ² Sede yebu hnë fop vile hnuhuho: rac ye wanës Wën g'ucedëya Yesu Këris ña. ³ Ndëwayik ale harañëhnëdëhëhni vahnë wanës wante kerëhnëko Wënu ña hn'añi kayëte do ndëwayini vële wëryëd va do hwëtaď wante herik ña! Yëtëryin, wati le hahnëndik soñe wañi fop ña tëhajëk.

Simpañi le kerëhnini vacery sali Asi

⁴ Ami San herëhnëryidëhu, wuhnë vacery sali mbëd gë vaki vambë Asi vi. Arabi ipërëna wã gë yam ÿa ahnuyãwu hnë Wën hna, umë ale ye, yeho do yijëd, hnë wayir mbëd gë wahi hna

wale ye haryënkw hnë tinki naw̃ ntëwu hna, ⁵ do fëna hnë Yesu Këris hna, sede hahnëndak ŷa, ale ryënkwik vëhnëndehnik hnë vësëm hna do ye ahnaŵ vëhnaŵ ŷa nkal li fop! Umë ale ŷahnëkëfu do fehëtëkëfu hnë wameh fu hna gë sat lëwu ŷa, ⁶ ntikëfu inaw̃ vësëna wasadëha soŋe ndokuŋëhnëndenëhna Wënu ŋa, Rëmu. Arabi kwëhn icëmb inja gë fanka fa kwëlëkwël! Amina.

⁷ Yëkëryin, vëŋar hna njijëd! Vahnë va fop nuđëniha, wëla vële sëhëka va;✧ do fop wabulunda wabë nkal ŋi njahnadëni soŋe lëwu ŷa. Ha! Amina!

⁸ Ahwëhn a Wënu ŋa ntehnëk: «Ami ye Alëfa gë Omega, Aryënkwëryënkw a gë Arëkwa ŷa, ale ye, yeho do yijëd, Ahwëhn Fanka Fop.»

Hudakery San soŋe Ajë Ahnë

⁹ Ami San, aŷënta hun yebu; mbankinëk had wühnë gë Yesu hnë horot hna, hn'imëk hna do hn'iduñëna hna. Ntayibuho hnë tinti mbë wov le wacik Patëmos hna, kabi pëyahnëdëfuho wanës Wënu ŋa do sede yebuho wëba Yesu. ¹⁰ Hnë fac Ahwëhn hna, Iyir Ipacah ŋa tënkëkoŵo do hamëhni mën nkwëryëfu kopa sankaf had lënk, ¹¹ më lehnëdëho: «Kerëry hnë kayëte ile hnuđu ŷa, do yëđanahnëryihni vacery sali mbëd gë vaki vante ye hnë: Efes, Sëmirën, Perëgam, Tiyatir, Sarëdes, Filadelëfi do Lawodise.»

¹² Njëkadëfuho soŋe hnuwuŵa ale hnësëndëhoŵo ŷa. Ga njëkabu, më hnuđu wayul wasanu mbëd gë wahi wakwëhn

✧ 1:7 1.7: San 19.37

walampu, ¹³ do fagant wayul walampu warac, kahnëko ile mëntëlëni g'ahnë. Acud cankaf nte rëkëkaŵo hafo wapary hna cudako do ñëba ryil yankah sanu sakahn lëwu hna. ¹⁴ Njerëkaŵo mul iña had perëkal. Vinkër va had hwëdëh pëtëdëhawo, ¹⁵ wapary ña had ryëhwëra vëntëvënt facënik hnë hwëdëh nkehawo do kopa lëwu ÿa had uŵac wënka wov ñënkadëhawo. ¹⁶ Hnë vák rëhw lëwu hna, wahol mbëd gë wahi mënkwëko. Wës lëwu hna sëlame ÿakënik hwëhn wanëkan waki sahnëdëho, do yëka lëwu ÿa ntancëko had ulav g'anent.

¹⁷ Ga nubuha, njobuho haryënk w lëwu had cëmëbu. Më tindëko vák rëhw lëwu ÿa do ntehno: «Antë ntaki! Ami ye Aryënk weryënk w a gë Arëkwa ÿa, ¹⁸ Ale yënëf a. Cëmëbuho, do wëli tame ale yënëf kwëlëkwël yebu. Visëdëta icëm va wënkëbu do gë viva yëŵa vësëm ÿa.

¹⁹ «Awa kerëry vile hnuru va: vile ye gaki va do vile yejëk va. ²⁰ Wëli ile pëhnëtanëk wahol mbëd gë wahi wale hnuru hnë vák rëhw mën ÿi do gë wayul sanu mbëd gë wahi wahwëhn walampu: wahol mbëd gë wahi wï wamëleka vacery sali mbëd gë vaki vi ye, do gë wayul mbëd gë wahi wahwëhn lampu wã, vacery sali mbëd gë vaki vi ye.»

2

Soñe ile kerëhnëkëhni San vacery sali mbëd gë vaki

Soñe acery sali mbë Efes

¹ «Kerëhnëryehna mëleka acery sali mbë Efes ña:

«Wëli wante ntehnëk ña ale wënkëk wahol mbëd' gë wahi hnë vák rëhw lëwu do yasëd' fagant hnë wayul sanu mbëd' gë wahi wahwëhn walampu wã: ² Njëtëbu vantiyehn hun va, ikamëna hun ña do gë iduñëna hun ña. Njëtëbu kodiluhna aryuñënanëhnuni vële lid wëh va, njëkëhnahnërunëhëhni vële wëcad' vëfayik wok vëyena paryi va do tëkatërun vëwër ye. ³ Nduñënarun, korotërun soñe wãc mën wã do cilëtaluhna.

⁴ «Bare nke ile surëdëmu: goluhna aýanduno gë kobëri ka. ⁵ Awa, dënkwëtaryin le njojërun hna, gwëcëtaryin vankeya va do avokanu anjasa ndënkwëryënkwa hun ña. Ge ñwëyërun gwëcëta diluhna vankeya va, njiryidëfu ýal hun hna do ntihëtëdëfu wayul walampu hun wã. ⁶ Bare nkehëhna ile fërënak hnë wühnë: had ami, ñëwëd'un vënjasa vëva Nikolayit va. ⁷ Ale hwëhna vanëf nkwëry wante ntehnëdëhëhni Iyir ña vacery sali va. Ale wëkëk a ma wëryanëdëfuha tok atëh uwám nte ye hnë arayen Wënu hna.»

Soñe cery sali mbë Sëmiren

⁸ «Kerëhnëryehna mëleka acery sali mbë Sëmiren ña:

«Wëli wante ntehnëk ña ale ye Aryënkwëryënkwa a do Arëkwa ýa, ale sëmëko do mbokaj wám li: ⁹ Njëtëbu horot hun ýa do gë haýëhna hun wã, bare ile ye toña ýa, mbetarun! Njëtëbu wameh wante nësëdëni

vëryampo soñe hun ÿa. Vërac ntehnëdëni wasëwif nkeni bare gena toña: caliña mba Sintani nkeni! ¹⁰ Antë ntaku gë horot le ÿad nkewü ÿa. Wëli, Sintani njëkëhnahnëdëhu ntonjatëhni vëyabah hnë wühnë kaso hna, do wafac pëhw horotëdun. Kahnëndaryin hafo hn'icëm hna do njëfadëmu apënkwi imëk, uwám sër wã. ¹¹ Ale hwëhñak vanëf nkwëry wante ntehnëdëhëhni Iyir ña vacery sali va! Ale wëkëk a cëmëdina cëm kigëna ña.»

Soñe cery sali mbë Perëgam

¹² «Kerëhnëryehna mëleka acery sali mbë Perëgam ña:

«Wëli wante ntehnëk ale hwëhñak sëlame ÿakënik hwëhn wanëkan waki ña: ¹³ Njëtëbu hn'ile ntëdërun hna, hn'ile nke inawë Sintani hna nke. Ha, ÿal hun hna ntëdëk Sintani ÿa, bare nkorun ayawënu uwãc mën wã, gwajëluhna ikwëtahn hun ña ÿal mën hna wëla fac le ndawïko Antipas, sedë hahnëndak mën a.

¹⁴ «Bare nke vile surëdëmu: kwëhñarunëhëhni hnam vahnë vële rëfëd' ikarañ Balam inja; nkabëka Balak tëndëhnëhni urënd vëva Isërayel soñe tokehnëhni fañar fale sënahnik sadëha wamën wawër do nkwañandëni. ¹⁵ ÿal hun hna fëna, kwëhñarunëhëhni vahnë vële rëfëd' ikarañ vëva Nikolayit va. ¹⁶ Awa, gwëcëtëryin vankeya hun va! Ge gwëcëtëluhna vankeya hun va tame njiryidëfu gë ÿal hun, do mëtaryëdëfuhëhni vahnë vi gë sëlame wës mën ÿi. ¹⁷ Ale hwëhñak vanëf nkwëry wante ntehnëdëhëhni Iyir ña

✧ 2:14 2.14: Vaker 25.1-2

vacery sali va! Ale wëkëk a njëdädëfuha tok man[☆] le soŵik ÿa do g'itaka yerah; hnë itaka tac kerik uŵac hasëk ule nkok yëtëna ahnë, ge gena ale hnuÿad ÿa.»

Soje cery sali mbë Tiyatir

¹⁸ «Kerëhnëryehna mëleka acery sali mbë Tiyatir ña:

«Wëli ile ntehnëk Aju Wënu ña, ale fëtëdëhaŵo vinkër vi had hwëdëh do wapary ña had ryëhwëra vëntëvënt facënik hnë hwëdëh nkehaŵo. ¹⁹ Njëtëbu vantiyehn hun va gë injahn hun ña gë ikwëtahn hun ña g'iyoh hun ña g'iduñëna hun ña. Iyoh hun nte yabëk ntëbi mbë kobëri ña.

²⁰ «Bare nke ile surëdëmu: memaÿehnëluŵahna asëval a, Yesabel, ale liyak ahnësëhn Wën, tokahni vëyohal mën va ñañëndëdëhëhni nkwaŵandëni do tokëndëni faÿar fale sënahnik sadëha wamën wamër. ²¹ Njëdäbuha ampëd soje gante kod nkweçëtahn ankeya ntëŵu ña, bare ñadina tav igwafa dëŵu ña. ²² Soje rac ntonjëdëfuha hn'ipad, umë gë vële gwafalandëni va, hn'ile korotëdëni dus. Ntidëfu rac ge vëravëna viŵeh vile ntidëniho g'asëval arac. ²³ Ndawëdëfuhëhni vële rëfëdëha va. Koyëna fop vacery sali va njëtëdëni ami ye ale yëtëd ile yehëhni vankaf hni hna wasakahn hni hna. Ale-wo-le hnë ŵuhnë, ile ntik ÿa, sosëdëfuha.

²⁴ «Bare ŵuhnë vëvë acery sali mbë Tiyatir, vële wok vërëfëna ikarañ viÿë vahnë,

☆ **2:17** 2.17: Icahn 16.32-34

ŵuhnë vële wok ñëgaluhna ile macëdëni watëŵah wante cowëk Sintani, ntehnëdëmu: dïbëndëdiluhna idïb kawary. ²⁵ Bare yaŵënëryin ile hwëhnarun ÿa hafo yiryiwu.

²⁶ «Vële wod ndokuñëhnëndëniho hafo hn'ile tëkwëk hna, vëhni yed vële wëkëk va. Njëdadëfuhëhni imëk hnë wayal hna.

²⁷ «Naŵëhnëdënihëhni gë ryoko ryëhwëra: nihëdënihëhni had gante nihëde vapeya intil.✧

²⁸ Inji mëk ndampo fo nke g'inte hnuÿabu gë Rëm mën ÿa. Njëdadëfuhëhni fëna ikol mbë g'acahnëfëd ña. ²⁹ Ale hwëhna vanëf nkwëry wante ntehnëdëhëhni Iyir ña vacery sali va!»

3

Soñe cery sali mbë Sarëdes

¹ «Kerëhnëryehna mëleka acery sali mbë Sarëdes ña:

«Wëli ile ntehnëk ale wënkwek wayir mbëd gë wahi Wënu ña gë wahal mbëd gë wahi ŵa: "Njëtëbu vantiyehn hun va. Njëtëbu vahnë va ntiyahnëkëhni vëfëren fo worun, bare cëm ña yerun. ² Kwëtëryin hakili do yaŵënëryin ile wok hnë ŵuhnë soñe antë cëm kabi kamahnëbu wëla doku hun ryampo padëna haryënkwe Wën mën hna. ³ Awa dënkwëtaryin wanës Wën wante harañirun do wëryërun ña; yaŵënëryin do gwëcëtaryin vankeya va. Age kwëtëluhna hakili, njiryidëfu had ale; yëtëdiluhna hnë wati le njiryidëfu hnanëtu ÿa. ⁴ Bare nkeni vëryampo

✧ **2:27** 2.27: Wahnëwë 2.8-9

Sarëdes hna vële wok vëronkënëna viyi vilëw hni va. Vërac viyerah cudadëni do tëfëlëdëfun g'ami, kabi tëfahnëkëhni rac. ⁵ Vële wëkëk va vacud vajerah cudadëni; pëhwëcëda muk wamac hni hnë kayëte uwám hna. Tase Rëm mën gë wamëleka wadëwu pëyahnedëfu ami hwëhnëkëhni. ⁶ Ale hwëhna vanëf nkwëry wante ntehnëdëhëhni Iyir ña vacery sali va.”»

Soñe cery sali mbë Filadelëfi

⁷ Kerëhnëryehna mëleka acery sali mbë Filadelëfi ña: «Wëli ile ntehnëk Afacah a, ale ye toña ya, umë wënkëk sëdëta Ahnañ David ya, umë fidëtëd do ahnë kodina mbokary pid, umë fidëd do ahnë kodina pidët: ⁸ Njëtëbu vantiyehn hun va. Wëli kwëtëhnëmu haryënkwa hun rënka fidëtik le nkok kodina pid ahnë. Njëtëbu toyë fo kwëhnarun fanka fa, bare njawënerun wanës mën ña do yahëtalunohna alehnu yëtëlnohna. ⁹ Wëli, njëdadëmuni vahnë vëvë hnë calina mba Sintani, vële lehnëd wasëwif nkeni vi, bare wayena. Ha, ntidëfu njiryini ndëkwëhnëni haryënkwa hun, do njavëtëdëni ñahnëmu. ¹⁰ Kabi njawënerun wapacëk wanës mën ña, awa ami fëna njawënedëmu hnë wati horot sankaf le yijëd hnë duniya li fop soñe tëjini vële lëdëk nkal vi. ¹¹ Biyëdina njiryidëfu. Yañëneryin ile hwëhnarun ya, soñe antë ahnë nuf apënkwa nte fënkwirun kabi mëkërun. ¹² Ale wëkëk a, ntidëfuha ryoko sank hnë Cery Cankaf Wën mën hna do bokëdina cahn muk. Kerëdëfuha uwac Wën mën wa do uva inañ Wën mën ña, Yerusalem hasëk, le sëlid

g'ambin ðarël Wën mën hna. Kerëðëfuha fëna uwac hasëk mën wã. ¹³ Ale hwëhñak vanëf nkwëry wante ntehnëðëhëhni Iyir ña vacery sali va.»

Soje cery sali mbë Lawodise

¹⁴ «Kerëhñeryehna mëleka acery sali mbë Lawodise ña:

«Wëli wante ntehnëk ale wãcëde Amina ña, sede hahnëndak do ye toña ÿa, ale ye sankaf hnë fop vile ntik Wënu ña: ¹⁵ “Njëtebu vantiyehn hun va: yamëluhna yakëluhna. Bare ñakëndëbu ayamu ma ayaku! ¹⁶ Awa, kabi yakëluhna do yamëluhna, fagant fo nkerun, nkurëðëmu. ¹⁷ Ntehnëdun, mbetarun, nuÿarun hnapul yabah do ñoñ gojëluhna. Bare yëtëluhna meku, njiwëhñërun, kaÿëhñërun, mëpërun do ñas fo yerun. ¹⁸ Soje rac yabahnëðëmu alawu ÿal mën li sanu le facënik hnë hwëðëh ÿi, soje avetahnu paryi. Dëwaryin fëna viÿi viyerah asudandu, antë mbok cëfëhnu ige ñas fo ña. Dëwaryin kat vëlo soje ayehnahnu vinkër hun vi ahnundu wapacëk. ¹⁹ Ami, niradëfuhëhni do catënëðëfuhëhni fop vële ÿahnëbu va. Awa yohëryin, gwëcëtaryin vankeya hun va! ²⁰ Wëli, rënka hna kahnëbu do mbankëðëfu. Age ahnë nkwëryëk kopa mën ÿa do pidët rënka ÿa, tënkëðëfu ÿalu hna do tokëlahnëðëfun. ²¹ Ale wëkëk a ntañëndëðëfuha ðarël mën hnë tinki naŵ mën hna, had gante mëkëbu ka, ami fëna, do lañantiŵu gë Rëm mën ÿa hnë tinki naŵ lëŵu hna. ²² Ale hwëhñak vanëf nkwëry wante ntehnëðëhëhni Iyir ña vacery sali va.”»

4

Icëmb ŋa Ambin hna

¹ Ga ndëcëk watac, më hnuɓu rënka le fidëtik ambin hna. Kopa ryënkwëryënkw le wëryëɓuho hnësëhnëdëhoŋo had lënkɓ ŋa, më ntehnëko: «Kayi ani, rufi ile rëfëka tëki haryënkɓ ŋa.»

² Iyir Ipacah ŋa tënkëlehno taŋ. Hnulehnu nkeho tinki ahnaŋ mbin hna, do hnë tinki ahnaŋ tac ahnë laŋako. ³ Ale laŋako ŋa pëtëdëho had wëraka wanëfak, wale wăcik jasëp gë sarëdëwan. Tinki ahnaŋ ŋa icar ulaŋ hwërëkaŋo nte fëtëd had itaka nte wăcik emerod. ⁴ Caharaɓ hnë tinki ahnaŋ tac, watinki ahnaŋ wafëhw wahi gë wahnah (24) yeho. Hnë watinki ahnaŋ watac, vicër wafëhw wahi gë vëhnah (24) laŋako. Viyi viyah cudaniho, do pënkɓani vapënkɓ sanu ahnaŋ. ⁵ Tinki ahnaŋ hna cahniëdëho wabilëbil do wakopa do gë waparar. Haryënkɓ tinki hna warëh lampu mbëd gë wahi fëtëdëho: wayir mbëd gë wahi Wënu ŋa yeho. ⁶ Haryënkɓ tinki ahnaŋ hna nkeho had wov lancah, le wëntëlëk gë ancëka.

Darël tinki ahnaŋ hna caharaɓ, nkeniho wulaŋ wahnah wale hwëhnaɓ kore vinkër haryënkɓ gë kamëhni. ⁷ Ntaŋ dënkɓwëryënkɓ ŋa gë vësëhn mëntëlëniho, kigëna ŋa gë fëndahni mëntëlëniho, tarëna ŋa yëka ahnë kwëhnaɓo do inahëna ŋa gë jaro nte wayëd yaŋ mëntëlëniho. ⁸ Wulaŋ wahnah wă, ntaŋ-wo-ntaŋ, vampaŋ imbëd g'andaŋ kwëhnaɓo, do kore vinkër kwëhnananiho yaŋ gë gëd per. G'anent gë g'umëd njëwëdëniho kwëlëkwël:

«Pacëru! Pacëru! Pacëru!»

Ahwëhn, Wëñ Hwëhn Fanka Fop,
wëjë ale yeho, ye do yijëd!»

⁹ Do nte-wo-nte njëwëdëniho wulaŵ wahnah
wã icëmb g'untënah do g'icamehn soje ale lañak
hnë tinki ahnaŵ ÿa, Ale yënëd avë kantëm
a, ¹⁰ vicër wafëhw wahi gë vëhnah va (24)
ndënkwehndëniho haryënkwe hnë ale lañak
tinki ahnaŵ ÿa, cëmbëdënihawo Ale yënëd avë
kantëm a, ntonjëdëniho vapënkwe sanu vantëw
hni va, ntehnatëndëni:

¹¹ «Ahwëhn, Wëñ fu, tëfëki ahnuÿa
icëmb inja g'untënah ɲa do gë fanka fa,
kabi wëjë lik fop,
wëjë ÿadëho nke koyëna rac, nkelehn.»

5

Kayëte ɲa gë Fape fa

¹ Tac më hnuhu hnë vák rëhw ale lañako hnë
tinki ahnaŵ hna kayëte nte fëÿik, keru bambery
gë ipër per do ñamëndëlehni gë wuya wahwënta
mbëd gë wahi. ² Tac më hnuhuha mëleka hwëhn
fanka le rëy gë kopa sankaf: «Mo tëfahnëk nke
aÿamët ile ÿamëndëlehnik ÿi do pëÿët kayëte
ɲi?» ³ Wëla aryampo gelohna mbin hna, nkal li
ma kwëÿët nkal li janama hna, ale holëko pëÿët
kayëte ɲa, njëk ile herik bambery ÿa. ⁴ Do rac
koyehndëho ðus kabi ahnë gena ale rëfëkawo
nke afëÿët kayëte ɲa, njëk bambery. ⁵ Awa
aryampo hnë vicër hna më ntehnëko: «Boka
ho! Yëkëryehna, ivësëhn vë hnënk Yuda ÿa,✧
ale hnagik hnë hnënk Ahnaŵ a David, umë ale

✧ 5:5 5.5: Wapëgwala 49.9

wëkëk a lihëtëd ile ÿamëndëlehnik kayëte ña do fëÿëtëd.»

⁶ Tac më hnuÿuha Fape ga kahnëk fagant tinki ahnaŵ, kwëratëniha wulaŵ wahnah do gë vicër. Mëntëko had kácik. Wamiry imbëd gë waki kwëhnako gë vinkër mbëd gë viki, vinte ye wayir mbëd gë vaki Wën vinte sañëtik hnë nkal hna fop. ⁷ Fape fa pëñako soñe tebahn kayëte hnë vák rëhw ale lañako hnë tinki ahnaŵ hna. ⁸ Ante tebak kayëte ña, wulaŵ wahnah ŵa gë vicër wafëhw wahi gë vëhnah va (24) njonihó nkal hna haryënkŵ lëŵu. Ale-wo-le hnë vëhni itëmp mënkŵëko do gë vañërya sanu tëmpah iduf, inte yeho wayëfa vëfacah wale hayëndadëho g'ambin. ⁹ Hnëŵ hasëk njëŵëdëniho:

«Tëfëki ahnuÿa kayëte ñi,
 ayamët ile ÿamëndëlehnik ÿa,
 kabi káciruhó,
 do ntaŵëtëruhëhni soñe Wënu ña,
 vahnë hnë wahnënk hna fop
 gë vanësa hna fop gë wabulunda hna fop
 do gë wayal hna fop;
 gë sat hu ÿa,

¹⁰ ntiruhëhni inaŵ vësëna wasadëha Wën fu ña,
 do naŵëdëni nkal li.»

¹¹ Tac më yëkëbu do wëryëbu kopa wamëleka wayabah, wawuli wawuli, kodelohna ndëkwini. Caharaŵ tinki ahnaŵ hna, wulaŵ ŵuhnah hna do gë vicër hna kahnëniho. ¹² Njëŵëdëniho gë kopa sankaf:

«Fape fante haciko fa,
 umë ye ale rëfëka nuÿa fanka fa, gë hnapul
 ÿa, g'uyët ŵa, g'imëk inja,

g'untënah ŋa, gë icëmb ŋa do gë cëkwary
ŋa.»

¹³ Do nkwëryëdëfuhëhniwo fëna fop vile ntik
Wën va ambin hna, gë nkal hna, gë kwëyët nkal
li janáma hna, gë wov hna do gë fop le yehëhna
hnam ŷa, ga ntehnëdëni:

«Ale lañak tinki ahnaŵ ŷa gë Fape fa nke
icëkwary, g'idënën, g'icëmb
do gë fanka, kwëlëkwël!»

¹⁴ Do wulaŵ wahnah ŵa ntehnëdëniho: «Am-
ina!» Do vicër va njonihho nkal li soje
cëmbahnënihëhni Ale lañak tinki ahnaŵ ŷa gë
Fape fa.

6

Soje ipëyët kayëte

Soje ñamëndëlehn idënkwëryënk

¹ Awa, nubuha Fape fa ga nihëk ñamëndëlehn
dënkwëryënk hñë mbëd gë wahi hna,
wëryëlehnëŵa intawë dënkwëryënk hñë
wahnah hna ga ndekad had farat, nësatënd:
«Yij!» ² Hnulehnëŵa ipahnac yerah. Ale
hayëkawo ŷa unwary mënkwëko. Më njëdfayik
apënk wëwëk, tək nke aŵëk do njilehn mbok
mëk kat.

Kigëna

³ Ga nihëk ñamëndëlehn kigëna ŋa,
wëryëlehnëŵa intawë kigëna ŋa ga ndekad,
nësatënd: «Yij!» ⁴ Hnulehnëŵa pahnac
kawary bëntah had hwëdëh. Ale hayëkawo
ŷa hnuŷako imëk soje ntihët yam ŷa nkal li,

soŋe ndawëlahnëndëni vahnë. Më njëdfayik sëlame sankaf, njilehn.

Tarëna

⁵ Ga nihëk ñamëndëlehn tarëna ña, wëryëlehnëwã intawë itarëna ña ga ndekadë, nësatënd: «Yij!» Hnulehnëwã pahnac bahnah. Ale hayëkawo ÿa ile yaŋande mënkwëko. ⁶ Wëryëlehnu had kopa fagant wulawë wahnah hna ga nësëd: «Ile ryokuŋahnik fac ryampo ÿa, yaŋëh vantimp fo ntawëahnëdë, ile ryokuŋahnik fac ryampo ÿa wayaŋëh warar vëmalu fo ntawëahnëk. Ge wagu ña ye, g'uñen uŋa, nko koyëna.»

Nahëna

⁷ Ga nihëk ñamëndëlehn nahëna ña, wëryëlehnëwã ntawë nahëna ña ga ndekadë, nësatënd: «Yij!» ⁸ Hnulehnëwã pahnac ðunënkah. Ale hayëkawo ÿa, Icëm maciko, do ÿëwã vësëm ÿa rëfëlehnëdëhawo. Njëdfayiniho mëk iŋa hnë sah ryampo hnë wasah wahnah ðuniÿa li, soŋe ndawënihëhni vahnë va gë sëlame ÿa, gë inte ña, gë wates ña do gë wulawë wuyapah wã.

Bëryëna

⁹ Ga nihëk ñamëndëlehn bëryëna ña hnulehnuwëhni, kwëyët le cënade sadëha hna, walawëary vële ryawëiko soŋe ikahnënda dëwë hni ña wanës Wën do kabi wasede lëwu nkeniho. ¹⁰ Ndekadëniho ðus: «Wëjë, Ahwëhn a, ale ye Afacah a, ale ye toña ÿa, hafo guve napëdu ahitiŋëhni vahnë vëvë nkal vi awëcagëhni soŋe

sat fu le ndehëtëni ÿi? ¹¹ Awa më njëdayini alewo-le acud jerah can kaf, tac ntehnini nduñë nani toye, hafo padëni fop vële ryokunëhnëdëha Wën va, rëfëka ndawëni had gë vëhni ka.»

Kwëhn mbëd gë ryaŵ

¹² Ga nihëk ñamëndëlehn ikwëhn mbëd gë ryaŵ ña, inkal ña ñënkako d'us gë fanka, hnulehnu ulav ŵa mbahnëlehn had waÿehn do ulepera ŵa mbëntëlehn had wasat. ¹³ Wahol ŵa njolehni nkal li, had gante njojëd wanuÿ ka ge sël sankaf ÿa ñënkëka. ¹⁴ Ambin ña më njik had kayëte fëÿëde, do fop wahuÿ ŵa gë watinti ña kërëniko hn'ile nkeho hna.

¹⁵ Wati rac, vëhnaŵ vëvë nkal vi, gë wakamari ña, gë vësankaf wasofade ŵa, gë vëvetak va, gë vëhwëhn fanka va, gë vëramp va do gë vahnë vële ye afaya va, fop coŵaniho hnë wakary hna do gë hnë wëraka wahuÿ hna.

¹⁶ Ntehnëdënihëhniwo wahuÿ ŵa gë wëraka ŵa: «Yohahninëfu, do coŵëryinëfu ñaŵët yëka ale lañak hnë tinki ahnaŵ aÿi do gë antavah Fape ña! ¹⁷ Fac sankaf ntavah ntëŵ hni ña tëkik: mo hod mëkanti?»

7

Bulunda gë yavëta Wën

¹ Ga ndëcëk rac, më hnuhëhni wamëleka wanah ga kahnëni hnë wahëd wahnah wavë nkal ŵi. Pëlani wasël wahnah wavë nkal ŵi, soñe sël ÿa antë mbok cël nkal li, wov hna do fëna wëla hnë atëh ndampo. ² Do më hnuhuha mëleka haŵary ga kayëd gë cape pëhna lav.

Mënkwëko ile lihande iyavëta mba Wën paryi. Ndekandëhëhni ðus wamëleka wanah wante yëdayiko imëk mbëvehnëni nkal inji gë wov yi:
³ «Antë avëvehnu nkal inji, wov yi, vatëh vi, hafo lifuni yavëta wayëka hna vëyohal Wën va.» ⁴ Tac nkwëryëbu vahnë vële hnuÿak yavëta ÿa tëkëni wawuli keme gë wafëhw wahnah gë vënah (144,000). Vëhni wahnënk vijë Isërayel hna fop matiniho:

⁵ hnë hnënk Yuda hna: vahnë wawuli pëhw gë vëhi (12,000) liyiko yavëta ÿa;

hnë hnënk Riben hna: vahnë wawuli pëhw gë vëhi (12,000);

hnë hnënk Gad hna: vahnë wawuli pëhw gë vëhi (12,000);

⁶ hnë hnënk Aser hna, vahnë wawuli pëhw gë vëhi (12,000);

hnë hnënk Nefëtali hna, vahnë wawuli pëhw gë vëhi (12,000);

hnë hnënk Manase hna, vahnë wawuli pëhw gë vëhi (12,000);

⁷ hnë hnënk Simeÿo hna, vahnë wawuli pëhw gë vëhi (12,000);

hnë hnënk Levi hna, vahnë wawuli pëhw gë vëhi (12,000);

hnë hnënk Isakar hna, vahnë wawuli pëhw gë vëhi (12,000);

⁸ hnë hnënk Sabilon hna, vahnë wawuli pëhw gë vëhi (12,000);

hnë hnënk Yosef hna, vahnë wawuli pëhw gë vëhi (12,000);

hnë hnënk Besame hna, vahnë wawuli pëhw gë vëhi ntiyiniho yavëta (12,000).

Wabulunda mbin hna

⁹ Ga ndëcëk rac, më hnuɓuhëhni kore vahnë vële wok kodena ndëkwini. Vahnë vëvë wayal fop yeho gë wahnënk wãa fop gë wabulunda ña fop do gë vanësa va fop. Haryënkwi tinki ahnaŵ hna kahnëniho do gë haryënkwi Fape fa, viyi viyah ntiyaniho do mënkweni waryund.

¹⁰ Ndekadëniho ðus:

«Ipeh ña hnë Wën fu, le lañak hnë tinki ahnaŵ hna, matik do gë Fape hna.»

¹¹ Wamëleka ña fop caharaɓ tinki ahnaŵ hna kahnëniho, gë vicër va do gë wulawŵ wahnah wãa. Ga nkwëryëdëniho ile nësëdëniho vahnë ÿa, ndëkwëhnëdëniho hafo wayëka wãa ñak nkal ña do cëmbëdënihawo Wënu ña. ¹² Ntehnëdëniho: «Amina! Arabi idëwan ña, gë icëmb ña, g'usery wãa, g'icamehn ña, g'untënah ña, g'imëk ña do gë fanka fa kwëhn Wën fu ña kantëm! Amina.»

¹³ Awa, acër aryampo më tëyëko: «Vële liyak viyi viyah vi, vëhni mo ye do ne matini?»

¹⁴ Më lëkwabuha: «Ahwëhn mën, njëtëru!»

Tac më ntehnëko: «Vële wãatik horot sankaf va ye. Ndagëni viyi vilëw hni va do njerënëni hnë sat Fape hna. ¹⁵ Soñe rac nkeni haryënkwi tinki Wën hna do ndokuñëhnëdëniha g'anent gë g'umëd Cery Cankaf ntëwu hna. Ale lañak hnë tinki ÿa keryëdëhëhni. ¹⁶ Bokëdina njohni inte, bokëdina njohni wënka, do ulav wãa bokëdina njahni, ma yakah haŵary, ¹⁷ kabi Fape fante ye tinki ahnaŵ hna yed ahekery alëw hni ÿa, do njiryeryëdëhëhni gë wahayalin wënka uwám ka. Do Wënu ña pëhwëcëdëhëhni fop wankwën ña vinkër vidëw hni hna.»

8

Soŋe ñamëndelehn ikwëhn imbëd gë wahi

¹ Fape fa, ga nihëk ñamëndelehn kayëte ikwëhn mbëd gë wahi ŋa, ambin ŋa ndemëhnalehn mpëd.

Soŋe walënk w mbëd gë wahi

² Tac më hñubuhëhni wamëleka mbëd gë waki hahnëko haryënk w Wën hna; walënk w mbëd gë wahi njeđayiniho.

³ Mëleka hawary më njjëk ñëw haryënk w le cënade sadëha hna; ile fëdande iduf mënk wëko, gë sanu ntiyiko. Më njeđayik duf yabah soŋe pëd hn'ile ntide sadëha hna gante kayahnëd hwëcic ha gë wayëfa vēfacah va fop g'ambin. Hn'ile ntide sadëha hna, gë sanu ntiyiko do haryënk w tinki ahna w hna nke. ⁴ Hwëcic iduf ŋa gë wayëfa vēfacah na hnë vāk mëleka hna matëko kay hafo Wën hna. ⁵ Tac mëleka ŋa më nufëk ile fëdande iduf ŋa, pëbënëk hwëdëh hn'ile cënade sadëha hna, ntoŋ duniŋa hna. Awa pëgwëlehn taŋ wakopa waparar, wakopa, wabilëbil, do nkal iŋa ñënkalehn.

⁶ Wamëleka mbëd gë waki wante wënkëko walënk w mbëd gë wahi ŋa pëhwëtalehnëni soŋe ntënk wëni.

Soŋe icël lënk w ryënk wëryënk w

⁷ Mëleka ryënk wëryënk w ŋa cëlëko lënk w lëw u ŋa: wënk a wagurye gë hwëdëh, hna wëlek gë sat, ndehëtik duniŋa hna. Cape ndampo hnë vatar duniŋa hna ŋagëko, do tëh ndampo hnë

vatar vante ye duniya hna fëna ñagëko do fop idël ña ñagëko.

Soje icël lënkw higëna

⁸ Mëleka higëna ya cëlëko lënkw lëwu ya: ile wëntëlëk g'ikuj icankaf nte yagëd lojik wov hna. Cape ndampo hnë vacape vatar wov hna mbacako wasat, ⁹ sah ryampo hnë wasah warar le-wo-le yënëd wov hna mbëvehniko. Do hnë fop wakulu wavë duniya wi, sah ryampo hnë warar hna mbëvehniko.

Soje icël lënkw rarëna

¹⁰ Mëleka rarëna ya cëlëko lënkw ya: më njojëk g'ambin ikol cankaf nte yagëdëho had hwëdëh hucankaf. Sah ryampo hnë wasah warar wasën wasankaf hna fop do hnë wahayalin hna fop njojëko kol inja. ¹¹ Ikol tac, Wunkah maciko. Wënka wante njohahnëko ña mbacako wunkah do vëyabah cëmëniho kabi wënka watac cenihö.

Soje icël lënkw nahëna

¹² Mëleka hnahëna ya cëlëko lënkw ya: cape ndampo hnë vacape vatar lav hna ndafiko gë cape ndampo hnë vatar lepera hna do gë kol ndampo hnë wamol warar hna, soje antë nkor-yary idanc dëwu ña. Koyëna, fac ya nkoryeryina idanc dëwu ña do umëd ña fëna.

¹³ Awa tac më hnuhuha do wëryëbuha jaro nte wayëdëho yan do ryekadëho dus: Kata! Kata! Kata fëladëhëhni vële lëdëk nkal vi soje wamëleka watar wañëntaŵ wante fëhwëtaf cëlëni walënkw walëw hni wä!

9

Soñe icël lënkw vëryëna

¹ Mëleka vëryëna ÿa cëlëko lënkw ÿa: më hnuḅu ikol ga njojëko nkal li mati g'ambin. Ikol ña njëḏayik sëḏëta hatëh hatëwah. ² Ikol ña më pidëtëk rënka vë hnam ÿa do hwëcic cahnëlehni had hwëcic nkula cankaḑ. Rac huyëndanëk ulav wã g'ambin ña fop. ³ Do hnë hwëcic hutac cahnëḏëniho vampul campëndëni nkal li. Njëḏayiniho imëk ile wëntëlëk g'imëk wafawëry wã. ⁴ Mbañëhniniho antë përekanëni idël mbë nkal ñi, ma vatëh, ma vatëh rëhël vi. Tëfëkëhni tonihëhni vahnë vële wok vëliyina yavëta Wën fo hnë wayëka walëw hni hna. ⁵ Vëwawëryanilohna ndawënihëhni, ßare korotehnhëhni hnë wadepera imbëḑ. Horot le ntidënihëhniwo ÿa mëntëlëko had gante korotehneḑ ito fawëry ka. ⁶ Hnë wafac warac vahnë va njëkëlehnëḑëni icëm ña ßare vëhnudina. Përeḑëhëhni cëmëni, ßare icëm ña ñawëtadëhëhni.

⁷ Vampul va gë wafahnac wale fëhwëtak uwët mëntëlëniho. Inë le ye had apënkwa sanu ahnañ yehëhniwo vankaf hna, do wayëka walëw hni wã had wëva vahnë nkehëhniwo. ⁸ Imul dëw hni ña had iba vësëval nkehëhniwo, do wabeñ wadëw hni ña had wëba wabësëhn nkehëhniwo. ⁹ Wasakahn walëw hni wã had wajand waryëhwëra ntiyani nkehëhniwo, do wëñañ vampañ vantëw hni va had wëñañ saret hwëhn wafahnac wayabah wale yaryëḑ gë uwët nkeho. ¹⁰ Wasavët wã had wafawëry nkehëhniwo g'ile tohahnëḑëni. Hnë wasavët

walëw̃ hni hna nkeho fanka falëw̃ hni fale koroteyehnahnëdënihëhniwo vahnë hnë wadepera mbëd hna. ¹¹ Ahnaw̃ alëw̃ hni ÿa, mëleka hatëh hatëwah yeho. Uw̃ac lëwu gë Wa-ebëre ña Abadon yeho, do gë wagërek ña, Apoliyo, umë fëhnëtanëk Avëvehn.

¹² Kata ryënkwëryënkw ÿa ndëcëk. Wëli, wakata waki vokëd tëki.

Soje icël lënkw hwëhn mbëd gë ryaw̃

¹³ Mëleka hwëhn mbëd gë ryaw̃ ÿa cëlëko lënkw ÿa: më wëryëbu kopa le wātiko hnë wamiry wahnah wavë tabali sanu hn'ile cënade sadëha hna, ile yeho haryënkw Wënu ña. ¹⁴ Ntehnëdëhawo mëleka hwëhn mbëd gë ryaw̃ le wënkëko lënkw ÿa: «Pëtëryihni wamëleka wanah wante ÿabik vambëñ sën sankaf le wacëde Efërat.» ¹⁵ Awa wamëleka wanah wante fëhwëtako soje wati ÿa, gë fac ÿa, gë lepera ÿa do gë bëhn ÿa, pëtiniho soje ndawëniha aryampo hnë vërar hna. ¹⁶ Nkwëryëbu ga ntehnëde, wasodade wahwëhn wafahnac w̃a, wawuli wuli wakeme waki nkeniho (200,000,000). ¹⁷ Awa nubuhëhniwo wafahnac w̃a gë vële hayëkëhniwo va: cudaniho wayand waryëhwëra wavëntah had hwëdëh, bulu do yalëwaye. Vankaf wafahnac w̃a had vankaf wabësëhn nkeho. Hwëdëh nkusëdëniho gë hwëcic do gë vëd le fëdëd. ¹⁸ Aryampo hnë vahnë vërar hna mbëvëko gë hwëdëh, gë hwëcic do gë ivëd le fëdëd. ¹⁹ Fanka wafahnac w̃a hnë wawës walëw̃ hni hna nkeho do gë wasavët walëw̃ hni hna; wasavët walëw̃ hni w̃a

gë walën mëntëlëni, kwëhna vankaf do gë rac mbërehnahnëdëni.

²⁰ Vahnë vële woko vëvëvëna va, vëravëlohna icëmb wayine ña gë vile përeni gë wëbák wadëw hni: wamën wamër sanu, gë koryi, gë waryëhwëra, gë wëraka, do gë wadëhwa; wamën wale wok kodina nu ma nkwëry ma ñas.

²¹ Fëna vëravëlohna idaw vahnë, gë kavëla ntëw hni ña, gë ndakëntal meh ntëw hni ña do gë ulë lëw hni wã.

10

Mëleka ña gë fëkayëte fapëyik fa

¹ Më hnuhuha mëleka hawary hwëhn fanka sëlidëho g'ambin. Anjar fëryëkawo do car ulaw yehawo yan nkaf ntëwu hna; yëka lëwu ña had ulav nkehawo, do wapary wadëwu ña had sahnunt hwëdëh nkehawo. ² Fëkayëte fante fidëtik mënkweko. Tindëko fary rëhw lëwu ña wov hna do rahahn ña nkal hna, ³ tac ndeka gë fanka, had vësëhn yërëlak. Ga ndekak, waparar mbëd gë waki yëmëko. ⁴ Ga nëmëk waparar mbëd gë wahi wã, ñadëfuho heru, bare kopa wëryëbuho g'ambin ga ntehnëdëho: «Antë aher ile nëmëk waparar mbëd gë wahi wï, tavëry cowã.»

⁵ Tac mëleka le hnuhuho ga tindëko fary rëhw lëwu wov hna do rahahn ña nkal hna, më njelëk vák rëhw lëwu ña g'ambin, ⁶ më ntëkëk g'uwac ale ye kwëlëkwël ña, ale lik ambin gë ile ye hnam ña fop, gë nkal ña gë le ye hnam ña fop, gë wov ña gë le ye hnam ña fop ntehn: «Ñoñ bokëdëna napi: ⁷ hale ntënkweđ mëleka hwëhn mbëd gë

waki ÿa lënkw lëwu ÿa, awa Wënu ña padënëf viyë visiyamah, gante pëyakëhniwo ka vëyohal vëlëwu wakila ña.»

⁸ Do kopa le wëryëbuho ga nësëhniðëho g'ambin ÿa mboko nësëhne kat: «Yiry ahnuf kayëte nte fidëtik hnë vák mëleka le rindëk fary ryampo hnë wov do ÿëntaã ÿa nkal hna.»

⁹ Gë vëhni mëleka njidëfuho rëyëwa njëdaãwô fëkayëte fa. Më ntehnëko: «Tebary do tokëry. Nkunkëf donk hu hna bare wës hu hna ntëmëf had wadëj.» ¹⁰ Më rebabu fëkayëte fa hnë vák mëleka hna do rokëbu. Wës mën hna ntëmëko had wadëj, bare ga kohnëbu nkunkëko donk mën hna. ¹¹ Tac më lehnifu: «Afo avok afëyahn ile pëhnanëhnëkëhni Wënu ña wabulunda wayabah, gë wayal wayabah, gë vanësa vajabah do gë vëhnaã vëyabah.»

11

Wasede wahi wã

¹ Tac ahnë më njëfako uriry le ÿañande, do ntehno: «Yiry ayan Cery Wën Cankaf ñi gë hn'ile cënade sadëha hna do dëkwëryihni vële sëmbëdëha Wënu ña hnam. ² Bare selele vë pë Cery ÿa, tavëry, antë ayan, kabi vële wok vëyëtëlahna Wën va maãwëryanëdeni nkëñëni nkol naã cëvah ña hnë wadepëra wafëhw wahnah gë wahi (42). ³ Maãwëryanëdëfuhëhni wasede wahi mën wã, vële sudak viyi icëm va, imëk pëyahnëndëni wanës Wënu ña hnë waï wafac wuli gë wakeme waki gë wafëhw mbëf gë ryaw (1,260).» ⁴ Waï wasede wahi ye vatëh oliv vaki va do gë wayul walampu wahi wale

ye haryënkw Ahwëhn nkal ña. ⁵ Ge ahnë ñad ntihi uweh, hwëdëh sahnëd wawës walëw hni hna do mbëvehnëdëhëhni vële yëwëkëhni va. Ha, ale yad ntihi wëh wã tëfëka ndawï koyëna. ⁶ Waÿi wasefe wahi kwëhnani imëk soje pidëni ambin, memaÿehnahneni antë mbok tëv hnë wati le pëyahnëdëni wanës Wën hna fop. Kwëhnani fëna imëk soje nkwëcëtëni wënka ña nke wasat do cëlëndi nkal li sifa uweh fop, nte-wo-nte ñadëni ña.

⁷ Ge puhnani wafac ucedeya ntëw hni ña, intaw yapah ña ndanid hnë hatëh hatëwah hna mëtaryëdëhëhni, mëkëdëhëhni do ndawëdëhëhni. ⁸ Do waÿas walëw hni wã hnë yëwa bulunda nkol cankaf hna nkod, nkol cankaf nte ye had Sodom gë Esipët*, hn'ile pakiko Ahwëhn hni hna dënk nke. ⁹ Vahnë hnë wabulunda hna fop, wahnënk hna fop gë vanësa hna fop do gë wayal hna fop njijëdëni njëkëndëni waÿas walëw hni wã hnë wafac warar gë fagant fac, do vëwawëlohna mbañini. ¹⁰ Vëvë duniÿa vi nëjëdëhëhni soje icëm wakila waki watac kabi korotehnenihëhni dus vële lëdëk nkal vi. Awa natëdëhëhni do nkwëcëtëledëni wabuña.

¹¹ Ga ndëcëk wafac warar gë fagant fac ÿa, iyën uwám le watik Wën njij tënkëhni wakila waki ña, matëlehnëni. Awa vële yëkëdëhëhniwo va më ntakëkëhni dus. ¹² Tac wakila waki ña më nkwëryëni kopa sankaf

* **11:8** 11.8 Sodom gë Esipët: Wënu ña hitijëk vani vacape waki ntëbi waÿëntaw wã. (Wapëgwala 19.24-25; Icahn 14.23-28)

le w̃atik g'ambin, ga ntehnëd̃ëhëhni: «Kayin ani!» Kayëlehnëni g'ambin, hn'anar, tase vële yëw̃ëkëhni va. ¹³ Hnë wati rac dënk, ñënkalehn nkal iŋa gë fanka, cape ndampo hnë ipëhw naŵ hna njolehn. Vahnë wawuli mbëd gë vëhi cëmëniho hnë iñënka nkal tac. Vële woko va ntakëkëhniw̃o do ntënëd̃ënihaŵo Wën hunte ye g'ambin ŋa.

¹⁴ Kata higëna ỹa ndëcëk. Wëlin kata rarëna ỹa biyëdina tëkid.

Soje lënkw hwëhn mbëd gë wahi

¹⁵ Mëleka hwëhn mbëd gë wahi ỹa më ntënkwëk lënkw ỹa: wakopa wacankaf ntehnëd̃ëho ambin hna:

«Inaŵ mbë d̃uniỹa ŋi nke gaki hnë wëbák
Ahwëhn fu ỹa gë Arëhnayik alëwu ỹa.

Nawëd̃ kwëlëkwël!»

¹⁶ Vicër wafëhw wahi gë vëhna, vële lañako hnë watinki ahnaŵ hna haryënkW Wën hna, ndëkwëhnëniho wayëka w̃a nkal hna do cëmbëd̃ënihaŵo Wënu ŋa nësätëndëni:

¹⁷ «Camehnëderu, Ahwëhn Wën Hwëhn Fanka
Fop,

ale ye do ale yeho,
kabi fanka fasankaf hu fa rufahnëru
ahahnëndahn inaŵ hu ŋa.

¹⁸ Wayal w̃a ntavëkëhni,

bare tame ntavah ntëw̃ hu ŋa rufëhna.
Wati le hitiŋahnëd̃uhëhni vësëm va tëkëk
gë le vuñahnëd̃uhëhni vëyohal hu va, wak-
ila ŋa,
gë vëfacah va do gë fop vële lënëd̃ w̃ac hu w̃a,
vëroy gë vëhnaŷah

do gë le vēvehnēdfuhēhni vēle vēvehnēdf nkal va.»

¹⁹ Do Cery Wēn Cankaf g'ambin ña pidētalehn, hnulehnu kwēni akwētēla ña. Awa nkelehn wabilēbil, wakopa, waparāt, iñēnka nkal do gë rēv wagurye wayabah.

12

Soñe wēdahēse mbēdf gë wahi

Soñe Asēval a gë fato fa

¹ Ga ndēcēk watac, dahēse fēmpēhnahnah sankaf sahnēk ambīn hna: asēval yeho ale sudako ulav, ulepera wā wapary hna nkehawo do pēnkwako apēnkw ahnaŵ hwēhn wāhol pēhw gë vēhi. ² Ndonkēko do ndekadēho ulav donk hnag wā.

³ Dahēse haŵary mbok cahnēlehn ambīn hna: fato vēntah sankaf yeho le hwēhnako vankaf mbēdf gë vaki gë wamiry ipēhw do gë apēnkw ahnaŵ hnē nkaf-wo-nkaf. ⁴ Savēt lēwū yā pahēcēko sah ryampo hnē wasah warar wāhol wavē g'ambin hna ntoñi nkal li. Fato fa mē kahnēk haryēnkw asēval ale yād nag yā, soñe kohna fatah fa ge rēk nagi. ⁵ Asēval a mē nagēka facan, fante hnaŵēndēhēhni do heryēdf wayal wī fop gë ryoko ryēhwēra. Fatah fa njoyiko tañ darēl Wēn hna do gë darēl tinki unaw ntēwū hna. ⁶ Awa asēval a nkaryēlehn gë wula, yēwā le pēhwētēhnēkaŵo Wēnu hna, soñe pabahna hnam hnē wafac wuli gë wakeme waki gë wafēhw mbēdf gë ryaw (1,260).

7 Tac nkelehn uwët ambin hna: Misel gë wamëleka wadëwu ña mëtaryënihaŵo fato fa. Fato fa umë fëna mëtaryëdëhëhniŵo gë wamëleka wadëwu ña, ⁸ bare fato fa wëkiko, do umë gë wamëleka wadëwu ña ntayiniho ambin hna. ⁹ Fato fa ntonjiko gë pë; umë ye lën sër ÿa, le wacik Aÿeŵ vahnë ma Sintani, ale rokad ðuniÿa fop. Ntonjiko nkal hna, do gë wamëleka wadëwu ña per.

¹⁰ Tac më wëryëbu kopa sankaf mbin hna, më lehnëdëho:

«Tame ipëh ña do fanka fa
do Inaw Wënu fu ña

do gë ucankaf Arëhnayik alëwu ÿa tëkik!
Fato fa, ale hnësëdëho wameh vëÿënta fu va
haryënkW Wën fu
g'anent gë g'umëd, ntonjiko ntayiko ambin.

¹¹ Do vëÿënta fu va mëkëniha
gë sat Fape fa
do gë wanës Wën wante cedëyahnëdëhni
ña;
vëÿëÿëryalohna njëdahnëni uwám walëw hni
wã, këbënanihho soñe cëmëni.

¹² Soñe umë ye natëryiÿi, ambin,
do gë wühnë vële lëdëk hnam va!
Kata yehu wühnë, nkal gë wov,
kabi Sintani cëlëryik ðarël hun.

Antavëka ðus
kabi njëtëk wati le nkoryaryëk ÿa yabëna.»

¹³ Fato fa, ga kamahnëk ntonjiko g'inkal,
më tëfëlendëha asëval ale hnagëkawo facan
fa. ¹⁴ Bare asëval a më njëdäyik vam-
paw jaro cankaŵ va soñe matahn nji gë wula

ÿëw̃a le pëhwëtanëhnik hna, hn'ile pabëdehna wabëhn watar gë fagant bëhn, ñawët lën* rac. ¹⁵ Awa lën ÿa më nkurëk wënka wante ye had garyëla hamëhni asëval a, soñe wënka ña njohna. ¹⁶ Bare nkal ña ndemakawo asëval a; pidëtako do kohn sën le nkurëko fato fa. ¹⁷ Fato fa ntavëkawo d'us g'asëval a, do më njik mëtaryëhni vutah vuñëntaw̃ vumba asëval va, vële w̃awëhnëd vakwëda Wën do sedeyahnëdëha Yesu va. ¹⁸ Tac më kahnëk tëfary wov hna.

13

Ntaw̃ yapah ndampo nte sahnik wov hna

¹ Awa nuëbuha ntaw̃ yapah ndampo ga cahnid wov hna. Kwëhnako wamiry pëhw gë vankaf mbëd gë vaki. Hnë w̃iry-wo, apënkwa ahna w̃ pënkwa do hn'ankaf-wo nkeho uŵac le yewëdëha Wënu ña. ² Intaw̃ nte hnuëbuho ña gë gërëm mëntëlëniho, wakwër wadëwu ña njëwëko do kwëhnako wakarehn wayaryah, do wës ÿa had va vësëhn. Fato fa më njëdaka fanka falëwu fa, tinki ihna w̃ dëwu ña do g'ucankaf camah. ³ Ankaf ndampo ntaw̃ ntiyako cërëk had cëm, bare tame sër lëwu ÿa njërëk. Awa duniÿa ÿi fop pëmpëhnahnëkawo gë watac do tëfëlehnëniha intaw̃ ña. ⁴ Vahnë va fato fa cëmbëdëniho kabi intaw̃ ña njëdako ucankaf ña do intaw̃ ña cëmbëdëniho ntehnëndëni: «Mo këñëlahnëni g'intaw̃ ñi do mo hođ mëtarya?»

* **12:14** 12.14 Lën w̃acik fëna fato ma Sintani.

⁵ Intawñ ña mawëryaniko soje kol nañënannd do nësënd wante yewëdfëha Wënu ña. Njëdayiko imëk ntind cankaŋ ntëwu ña soje wadepera wafëhw wahnah gë waki (42).
⁶ Nësëdëho wameh njewënda Wënu ña: uwac Wënu ña njewëdfëho gë yëwa le ntëfahnëk ÿa do gë fop vële lëdfëk ambin va. ⁷ Njëdayiko ucankaŋ soje kol mëtaryëhni vëfacah va do mëkëhni. Njëdayiko ucankaŋ ña hnë wahnënk fop gë wabulunda hna fop gë vanësa hna fop do gë wayal hna fop. ⁸ Fop vële lëdfëko nkal vi, vële woyiko kerina wamac wadëw hni wapëgwa duniÿa hna hnë kayëte uwám Fape fante hácik fa, cëmbëdëniha ntañ ña.

⁹ Ge ahnë kwëhnak vanëf, nkwëry!

¹⁰ Ge ahnë tëfëka nke aramp,
 aramp yed;

ge ahnë tëfëka ndaŵi gë sëlame,
 gë sëlame ndaŵëde.

Wati ÿa ye le tëfahnëkëhni kwëhnani vëfacah va iduñëna ña do ikwëtahn ña.

Ntañ nte sahnik nkal hna

¹¹ Tac më vokëbu hnuwa intawñ yapah kawary ga cahnid nkal hna. Wamiry waki kwëhnako had fape, bare had fato nësëdëho. ¹² Kwëhnako fop ucankaŋ ntañ nte sahniko wov hna do ucankaŋ tac ndokujahnëdfëho tase ntëwu. Intawñ bë nkal ña porosiñehnëdfëho nkal ña gë vële lëdfahnëk va njëfandëniha intawñ bë wov ña nte yërëniko usër le rywëdf. ¹³ Intawñ bë nkal ña ntiko viÿë vifëmpëhnahnah dus afo cëlëndi hwëdfëh g'ambin, tase vahnë fop. ¹⁴ Gë

vifëmpëhnahnah vile maŵëryahniko nti tase intaŵ bë wov ña tokakëhniŵo vële lëdëk nkal va. Më ntehnëkëhni vële lëdëko nkal va mbëryëni ile wëntëlëk g'intaw bë wov nte sërehniko do vokajëk uwám hna. ¹⁵ Njëd'ayiko fëna imëk njënëndahn ile liyiko mëntëlëni g'intaw bë wov ña gante kolahnëd nësënd do ndaŵëhnëndëhni fop vële wok vëyëfadilahnah va. ¹⁶ Ntiko fëna hafo vahnë va fop, vutoy gë vëhnaŷah, vëvetak gë vëhaŷëhnah, vële ye afaya gë vëramp, maŵëni ntiyini yavëta vák rëhw hna ma yëka hna. ¹⁷ Do ahnë antë kol ntaŵ ma nkwaŷ iñë ge kwëhnana yavëta ŷa, umë ye uŵac intaŵ bë wov ña ma idëkw nte rëfëlëk gë uŵac rac ŵa.

¹⁸ Wati ikwëhna uyët ŵa ye. Arabi ale hwëhnak hakili ŷa nkwëry ile pëhnëtanëd viņi vidëkw intaŵ vi, kabi idëkw tac soņe vahnë va ye, do idëkw tac ye wakeme imbëd gë ryaŵ gë wafëhw imbëd gë ryaŵ gë imbëd gë ryaŵ (666).

14

Fape fa gë vële ntaŵëtëk va

¹ Tac nubuha hnë Ikuņ Siŷo* hna Fape fa ga kahnëni gë vahnë wawuli keme gë wafëhw wahnah gë vënah (144,000), vële heriko ŵac lëŵu gë ŵac Rëmu hnë wayëka hna. ² Do më wëryëbu kopa le ŵatik g'ambin ŷaŵëdëho had wavonkëlo wënka wov, had farat sankaf. Kopa le wëryëdëfuhö ŷa mëntëlëniho fëna

* **14:1** 14.1 Siŷo fakun ye Yerusalem hna hn'ile nke Cery Wën Cankaf hna.

g'itëmp nte rëmpëde. ³ Vahnë vërac hnëw̃ hasëk njëwëdëniho haryënkwa tinki ahnaw̃ hna gë haryënkwa wulaw̃ wahnah hna do gë vicër hna. Ahnë kodilohna ñëña hnëw̃ rac ge gena vahnë wawuli keme gë wafëhw wahnah gë vënah (144,000), vëhni vële lawëtiko nkal va. ⁴ Vële wok vëronkënanana gë vësëval va ye, vëyëtëna vësëval. Fape fa tëfëlehnëdëni fop le njid hna. Ntawëtini hnë vahnë hna soñe nkeni vëryënkwa vëryënkwa vële sënayik had sadëha Wënu ña gë Fape fa. ⁵ Kobëri vëwëreña; vëhwëhnana ile nirañeni.

Ipëyahñ kiti

⁶ Tac më hñubuha mëleka hañary nkwayëdëho yañ. Gë Wanës Wakasëk wante wok dëcëdëna, wante rëfëkawo pëyahni vële lëdëk nkal va, njijëk: vahnë hnë wayal hna fop gë wahnënk hna fop gë vanësa hna fop do gë wabulunda hna fop. ⁷ Gë kopa sankaf ntehnëk: «Dënëñëryina Wënu ña do cëmbëryina, kabi wati kitiñ dëwu ña tëkik. Cëmbëryina ale lik ambin gë inkal ñi, gë wov yi do gë wahayalin ñi.»

⁸ Tac, mëleka higëna më tëfika do ntehn: «Njok! Babilon Samah ña njok! Umë ye ale yëdäkëhni wayal wï fop ceni uñen nte liyëhnëdëhëhniwo kwëlëkwël le ñëwëk Wënu ña!»

⁹ Mëleka rarëna më tëfikëhni wayëntaw̃ wã do gë kopa sankaf ntehnëk: «Ge ahnë sëmbëdëha intaw̃ ña gë ile liyik mëntëlëni g'umë ña, ge nuñak yavëta ña yëka hna ma vák hna,

¹⁰ ced umë fëna uñen antavah Wënu ŋa, unte hotayik hara cutina gë wënka hnë nkëlëwã tēmpah ntavah ntēwu hna. Sifa vahnë vërac korotēdēni dūs hwēdēh hna do gë hn'ivēd le fēdēd hna haryēnkw wamēleka wapacah hna do gë Fape hna. ¹¹ Hwēcic hwēdēh hunte horoteyehnēdēhēhni vële sēmbēdēha intaw̃ gë ile liyik mēntēlēni ŷa, vële hwēhnak yavēta uw̃ac lēwu va, cēhnēd kwēlēkwēl do vëhwēhnadina iyinēga g'anent g'umēd.» ¹² Wati ŷa ye le tēfahnēkēhni kwēhnani vëfacah va iduñēna ŋa, maŷēhnēni vakwēda vantēwu va do nko kahnēndani hnë Yesu.

¹³ Tac mē wëryēbu kopa ga ntehnidēho g'ambin: «Kerēry aki: Mbetani vële ye g'Ahwēhn a hafo cēm hna!»

Iyir Ipacah ŋa ntehnēk, «Ha, njinēgadēni wadoku wadēw̃ hni ŋa, kabi ile ntini ŷa tēfēlehnēdēhēhni.»

Soŋe ikitiŋa tēkwa

¹⁴ Ante njēkēdēfuho ŋa, nubuho aŋar jah, do hnë ŋar tac ale wēntēlēk g'ahnē lañako. Apēnkwa sanu ahnaŷ pēnkwaiko do mēnkwa ikáca ŋakah.

¹⁵ Tac mēleka haŷary mē cahnik Cery Wën Cankaf hna do ndekahna ale yeho hn'aŋar hna: «Dokuŋahnēry ikáca hu ŋi ahácahn, kabi uhác vë nkal ŷa mbēntēk.» ¹⁶ Awa, ale yeho hn'aŋar ŷa mē nkwēsirēk káca ŋa nkal hna, do uhác vë nkal ŷa fop káciko.

¹⁷ Tac mēleka haŷary mē cahnēgik hnë cery Wën cankaŷ mbē g'ambin hna; umë fëna ikáca ŋakah mēnkwēko.

¹⁸ Tac mëleka haŵary kat, le hwëhnako imëk hnë hwëdfëh ña, më cahnëgik hn'ile cënade sadëha hna do ndekahna ale wënkëko ikáca ñakah ña: «Nufëry ikáca hu ñi alëpëtahñ wadëwël atëh resen nkal ñi, kabi mbëntëk.»

¹⁹ Mëleka ÿa më nkwësirëk ikáca dëwu ña nkal li. Më mbarëpëk waresen wavë nkal wï, do ntonñ ile mbarëpëko ÿa hnë tank camah ntavah Wën hna le ñwëyëhnëde.

²⁰ Më ñwëyëhnik wadëwël ña hnë tank camah le ye hamëhni nkol hna; wasat më cahnëk hnë tank camah hna ñi had uŵac hafo tëk wawës wafahnac hna do campëko hnë wakilometër wakeme watar (300).

15

Soje vahnë vële nkok mëkëna ntaŵ ña

¹ Ga ndëcëk rac, më vokëbu hnuwu ambin hna dahëse haŵary samah do vënak: wamëleka mbëd gë waki wënkëk wëkata wacankaf mbëd gë waki. Wañi ye watëkwa ña kabi gë vëhni padënëd ntavah Wënu ña. ² Më hnuwu ile ye had wov lancah ile hnaŵëlëk gë hwëdfëh, do vële wok vësëmbëlahna ntaŵ ña g'ile fëriko mëntëlëni ÿa, gë vële wëyëk yavëta lëwu ÿa, ðarël hnë wov lancah rac kahnëniho. Warëmp wale njëdakëhniwo Wënu ña mënkweniho. ³ Njëwëdfëniho hnëwë Fape fa gë Moyis, ayohal Wënu ña:

«Ahwëhn Wën Hwëhn Fanka Fop,
Vantiyehn hu va camëk do mbënak!
Ahnaŵ wayal,

Vankaŵ hu va catëk do toña ye!

⁴ Mo wok dënëñëdfilihna, Ahwëhn?

Mo wok cëmbëdfina uŵac hu ŵa?

Wëjë fo ye afacah.

Fop wayal ŵi njijëdfëni do cëmbëdfëhnihi,
kabi nuni kitija hu ña.»

⁵ Tac nubu ambin Acery Wën Cankaf, rac ye usank[☆] ule ryënkwëtehnëdfëho kwëtëla ña, ga pidëtak, ⁶ do wamëleka mbëdf gë waki ña wante wënkëko wakata mbëdf gë waki cahnahnëni hnam. Vacuđ vacankaf vapacah vanjerah vante fëtëdf vante rëkëdfëhëhniŵo hafo wapary hna cudaniho do ñëbani waryil sanu wayankah wasakahn walëŵ hni hna. ⁷ Ryampo hnë wëlaŵ wahnah hna njëdfakëhniwo wamëleka mbëdf gë waki ñi ñërya sanu nte rëmpëhnik untavah Wën ale wok kantëm. ⁸ Idanc Wënu ña do gë fanka falëŵu fa pëbënëko Cery ñi gë hwëcic. Ahnë kodilohna tënk hnam hafo pad wakata mbëdf gë waki mba wamëleka mbëdf gë waki ñi.

16

Soje wakata mbëdf gë waki ña

¹ Ga ndëcëk watac, nkwëryëbu kopa sankaf hnë Cery Wën, le lehnëdfëhëhniwo wamëleka mbëdf gë waki ñi: «Yiryin do campehnëryin fop nkal li vañërya mbëdf gë waki ntavah mba Wën.»

Kata ryënkwëryënk

² Aryënkwëryënk a njik campehn ñërya ntëŵu ña nkal hna: wahajën waŵeh do walavah ryafëkëhniwo vahnë vële hwëhnako dahëse

[☆] 15:5 15.5: Vantiyehn 7.44

ntaw̃ yapah do sëmbëdëho ile liyiko mëntëlëni g'umë ÿa.

Kata higëna

³ Ahigëna ÿa campehnëk ñërya ntëw̃u ña wov hna: wënka ña mbacalehn had sat asëm, do fop vile yehëhna wov hna hwëhna sël uwám wã cëmëni.

Kata rarëna

⁴ Ararëna ÿa campehnëk ñërya ntëw̃u ña hnë garyëla hna do wahayalin hna: wënka mbacalehn sat. ⁵ Do nkwëryëbuha mëleka le hwëhna imëk hnë wënka ga ntehnëd:

«Catëru, wëjë ale ye do yeho,
kabi wakiti wante liru ña acatëk;

⁶ Vahnë va campehnëni sat vëfacah do wakila,
sat ye fëna ile yëdaruhëhni ceni.

Rac sanëkëhni!»

⁷ Do nkwëryëbu kopa le w̃atik hn'ile cënafe sadëha hna ga ntëkwad:

«Ha, Ahwëhn Wën Hwëhn Fanka Fop, wakiti wadëw̃ hu ña pëbëka toña do usatah.»

Kata hnahëna

⁸ Ahnahëna ÿa campehnëk ñërya ntëw̃u ña lav hna, do mawëryanik pëdëni vahnë va gë hwëdëh lëw̃u wã. ⁹ Vahnë va pëdëlehnini gë uyakah samah; njewëdëni uw̃ac Wënu ña ale hwëhna uwëka hnë wanji wakata, bare vëwëcëtana vankeya vantëw̃ hni soje cëmbahnëniha.

Kata vëryëna

¹⁰ Avëryëna ʔa campehnëk ñërya ntëwũ ɲa hn'itinki naŵ ntaŵ yapah hna: inawŵ ntëwũ ɲa pëbëlehna umëhwëry. Vahnë va ɲëradëniho ryëw ʔa kabi korotëdëniho ðus; ¹¹ njeŵëdëniha Wën mbë ambin ɲa soɲe wahorot walëw hni wï do soɲe waɲag vantëw hni vi, bare vēwëcëtana vankeya vantëw hni vi.

Kata hwëhn mbëd g'iryaw

¹² Ahwëhn mbëd gë aryaw a campehnëk ñërya ntëwũ ɲa hnë sën sankaf le wacik Efërat: wënka ɲa më nkuhënik pëhwëtani nkaŵ vëhnaŵ vēle wätid ipëhna lav. ¹³ Tac, hnë wës fato, hnë wës ntaŵ yapah do hnë wës kila wamër, nubu ga canëd wahakili warar waŵeh had wafor wasanjink. ¹⁴ Vëyin ye wahakili Sintani, wale lid wafëmpëhnahnah. Njidëni cap vëhnaŵ vēvē nkal fop, ndanko mbarëpëlahnëni soɲe wët fac sankaf Wën Hwëhn Fanka Fop.

¹⁵ Ahwëhn a ntehnëk: «Wëlin nkeryibu had ale. Mbetak ale heryëk do worryerik viyi vilëwũ va, g'antë nji wëtata fo soɲe antë tav nuyi usëfëhnah lëwũ wã.»

¹⁶ Wahakili Sintani wã mbarëpënihëhni vëhnaŵ va hn'ile macik gë Wa-ebëre ɲa Arëmagedon.

Kata hwëhn mbëd gë wahi

¹⁷ Ahwëhn mbëd gë vēhi ʔa campehnëk ñërya ntëwũ ɲa sël hna do cahnëk hnë Cery Wën hna kopa sankaf le wätik tinki ahnaŵ hna ntehn: «Antiyak!» ¹⁸ Tac pëgwëlehn taɲ mbiliñëtënd, wakopa, wakopa waparät, do nkal iɲa ñënkalehn ðus g'ante nkok diyahna

kobëri ga nkehahnëk ahnë nkal li. ¹⁹ Nkol cankaf ña capëko warar do vankol wayal wã fop mbëvëko. Wënu ña ndënkwëtajëko nkol cankaf nte wãcëde Babilon njëdahnã ñërya ñen ntavah cankaf ntëwu. ²⁰ Fop watinti ña nambiko do wahuñ wã njoko. ²¹ Wagurye wante rëkëhnëd wakilo wafëhw wahnah g'imbëd (45) g'ambin njohahnidëhëhniwë vahnë va do vahnë va njewëdënihawo Wënu ña soñe kata wagurye kabí iyi kata nkeho ulakëmak.

17

Intaw yapah g'ale wafad

¹ Tac, aryampo hnë wamëleka mbëd gë waki hna wante wënkëk vañërya mbëd gë vaki va njijëk ntehno: «Yij, tufëdëmi kitinã asëval ale yëtahnik igwafa cankaf, umë ye Babilon, ale lañak tëfary wasën hna. ² Vëhnañ wëvë nkal va g'umë nkwafoadëni do vële ye nkal va ndëwëni uñen nte nkwafoadëni.»

³ Tac Iyir Ipacah njihahniko do mëleka ya njoko hnë wula hna. Hnam nubuha asëval kayëka ntañ bëntëvëntak nte herik fop mbahn ntëwu hna wãc wayëw Wënu do hwëhnañ vankaf mbëd gë waki do wamiry pëhw. ⁴ Asëval a cudak viyi vële ye had bulu gë vëntëvënt, kayëtak sanu, wëraka wafërën do wanjere. Mënkwëk vák hna ñërya sanu, nte fëbëka wëh do ronk nkwafoadëni ntëwu. ⁵ Yëka lëwu hna keriko wãc ile hwëhnañ ufëhnëtahñ soñik:
«Babilon Cankaf,
hnëm vële wafad
do vankeya vakayah

vante ye nkal vi.»

⁶ Do nuɓuha asëval a ndëwëk sat vēfacah, rac ye sat waseɗe vēle sëmëk soŋe Yesu. Ga nuɓuha apëmpëhnahnëkowo.

⁷ Tac mëleka ŷa ntehnëko: «Soŋe ye pëmpëhnahnëki? Apëyaɗëmi ile pëhnëtahnek asëval a do ntaŵ nte ryibëka ŋi nte hwëhnak vankaf mbëɗ gë vaki do wamiry pëhw. ⁸ Ntaŵ tac nte nuru ŋi nkeho, bare gona. Cahniɗ hatëh hatëwãh hna do njiɗ gante mbëvëɗ. Do vēvë nkal va, vēle wok vēherihna wãc kobëri wapëgwala ðuniŷa hna, hnë kayëte uwám, vahnë vērac pëmpëhnahnëɗëhëhni ge nuniha intaŵ iŋa, umë ale yeho, wok gona, do vokajëɗ.

⁹ «Wati ŷa ye le rëfëka kwëhnahnin wasery gë hakili facah nkwëryahnin waŋi: vankaf mbëɗ gë vaki vi ye wahuŋ mbëɗ gë wahi le ndahëk asëval hna. Vërac ye fëna vēhnaŵ mbëɗ gë vēhi.

¹⁰ Imbëɗ fagant lëw hni njonɪ, ahwëhn mbëɗ g'aryaŵ ŷa nkok naŵ, ahwëhn mbëɗ gë vēhi ŷa wok tëkina ten, bare ante tëkiɗ ŋa biŷëɗfina.

¹¹ Ntaŵ ante yeho ŋi do wok gona, nke umë ðenk ahnaŵ ahwëhn mbëɗ gë vērar. Umë ye fëna aryampo hnë mbëɗ gë vēhi hna do njiɗ gante mbëvëɗ ka.

¹² «Wamiry pëhw wante hnuru ŋi ye vēhnaŵ pëhw vēle wok vēhnaŵëna ten, bare wati ryampo, vēhni gë ntaŵ ŋa nuŷaɗëni uŵëka ahnaŵ. ¹³ Vëhni fop nkwëryëla ndampo fo kwëhnani: njëɗaniha ntaŵ ŋa fanka do wëka lëw hni.

¹⁴ Vëhni wëtarëɗëha Fape fa, do Fape fa mëkëɗëhëhni, kabi umë ye Ahwëhn vēhwëhn, do Ahnaŵ vēhnaŵ, do g'umë vēle

ŵacik va, vërëhnayik va, vële hahnëndak va, məkëdënihëhni.»

¹⁵ Tac mëleka ÿa mbok ntehno: «Wasën wale hnuru ŵi, wale ntañahnëk asëval ale wafad ÿi, vëhni ye wabulunda, wakore wayabah, wayal do vanësa va. ¹⁶ Wamiry pëhw wante hnuru ñi do ntaŵ ñi ñewëdëniha asëval ale wafad, atebëdëniha fop do tavëdëniha wëtata fo; tokëdëni mbahn ntëŵu do mbëvendëniha gë hwëdëh. ¹⁷ Ha, Wënu ña kwëtëk hnë ntaŵary ntëŵ hni ntihahnëni vile pëhna nti va: njëdadëniha unaŵ ntëŵ hni ña ntaŵ ñi, hafo pad wanës Wënu ña. ¹⁸ Awa, asëval ale hnuru ÿi, ankol cankaf ñi ye nte hnaŵëhnëkëhni vëhnaŵ vëvë nkal vi.»

18

Iyo Babilon

¹ Ga ndëcëk watac, nubuha mëleka haŵary ga cëlid' g'ambin. Kwëhnako uŵëka sankaf do humpen hudëŵu ha pëtehnëko nkal ña.

² Ndekako gë kopa sankaf:

«Njok! Babilon Samah ÿa njok!

Ambacak ryaha wayine,

ryaha wahakili waŵeh,

ryaha wasëry waŵeh do waŵëŵik.

³ Ha, fop wayal ŵa cenii uñen ntëŵu

nte liyehnedëhëhniwo kwëlëkwël le ñewëk

Wën:

vëhnaŵ vëvë nkal va nkwafani g'umë,

do vëwaf vëvë nkal va mbetani soje hnapul

sankaf lëŵu.»

4 Do fëna nkwëryëbu kopa hawãary le wãtik
ambin hna ga ntehnëd:

«Cahnëryin aji nkol, bulunda mën,
danko antë ayentahniwũ wameh wadëwu,
do antë ahnuỹantiwũ wakata wante rëfëka
ñi.

5 Wameh wadëwu ña ndivëlëk hafo g'ambin
do Wënu ña ndënkwëtajëk vantiyehn
vameh vambë ñi nkol.

6 Diryina had gante ntikëhni vëỹëntaã ka,
bësaryina wahwënta wahi ile ntik ÿa.
Hnë ñërya uñen nte nkwëntëlehnëhnahnëkëhni
vëỹëntaã va,
nkwëntëlëhnehnëryin uñen nte yawëk
wahwënta wahi.

7 Nahnëk d'us icëmb gë hnapul.
Nësëd ntaãary ntëwu hna:
“Ami, ahnaã, ntañahnëbu tinki ahnaã.
Gela asëval ale cëmaryëk asan a do nuãa
muk ucay.”
Soñe rac, bësaryina uhorot do uỹëwëhna
sankaf!

8 Soñe watac, fac ryampo fo njohahnëdëha wañi
wakata:
icëm, ucay, inte. Do mbëvëd gë hwëdëh.
Njawëk Ahwëhn a Wën hunte hitiñëdëha.

9 «Fop vëhnaã vëvë nkal vële wafak g'umë do
ỹahëlëk hnapul lëwu ÿa, akodëni do njahnadëni
soñe lëwu ÿa, ge nuni hwëcic hwëdëh hunte
mbëvand ña. 10 Añëwëdëni ñawët soñe ntakah
iỹi horot do ntehnëdëni:

«“Kata! Kata! Babilon, nkol camah! Nkol
yawãh!

Wati ryampo fo njijëk kitin̄a hu ŋa!”

¹¹ «Do wëwaf wëvë nkal va kodëni do njahnadëni soŋe lëwu ŋa, kabi ahnë bokëdina ntaw̄ viyë vilëw̄ hni va: ¹² viyë sanu, kori, wëraka walakëlah, wanjere, wafand wahihnah gë wavëntah, wadëhwa wadakëlah do fop vile fërik gë beñ in̄i, gë wadëhwa wapërën, ile vufik, gë ryëhwëra do gë wëraka wawamah, ¹³ upih nte hnëŋënëd rokëtök, wadatikola do gë iduf, uñen, wagu, pih do watoka, wuhni gë wape, wafahnac gë wasaret, vëramp gë vële fëlayik.

¹⁴ «Wadëwel wabëntah wante valëkino ŋa ŋawëtaki, fop vële wamahnëki vi do fëtëd vi cëvayiki do bokëdina nuyi. ¹⁵ Wëwaf vële mbetëndanëk va ŋawëtiniho, soŋe ntakah uhorot lëwu w̄a; kodëni do njahnadëni. ¹⁶ Ntehnëdëni:

«“Kata! Kata! Nkol camah ŋa
 cudak wafand wahihnah fo
 do gë pand bulu gë mbëntah nte hambëka
 ntaw̄
 do kayëtak sanu gë wëraka walakëlah gë
 wanjere!

¹⁷ Wati ryampo fo përekanik iyi hnapul fop!”

«Do vëyaryary Sisikulu va fop, fop vëryokun hnë wënka va, añëwëni ŋawët. ¹⁸ Ante nuhni hwëcic hwëdëh hunte mbëvahnëd ŋa ndekaniho: “Añëhne nkol ga këñëlahnëni an̄i nkol cankaf!” ¹⁹ Pihani vëd hnë vankaf vantëw̄ hni, koni, do njahnani:

«“Kata! Kata, nkol camah
 ante vetëndanëkëhni fop vële hwëhna wa-
 sisikulu hnë wov hna!

Wati ryampo fo përekanik fop!”»

20 Kopa ÿa më mbok ntehnëk: «Ambin, natëryi
ÿi soñe ile përekanik nkol ñi!

Natëryiŵu, ŵuhnë fëna, vēfacah, vēfayik do
wakila,

kabi Wënu ña kitinëka soñe ŵeh ile ntiku
ÿa.»

21 Awa mëleka hwëhn fanka ryampo nufëk
taka dënah, më ntonëk wov hna ntehnatënd:

«Koyëna, gë fanka përekanëde Babilon nkol
camah

do mbokëdfena nuyi.

22 Do mbokëdfena nkwëry ÿal hu

kopa nkaŵ vërëmp tëmp,

vësël takëralu do vëlënkŵ,

fëna wëla aseryah aryampo gedina ÿal hu
hna.

Do fëna kopa tank gë hont bokëdfena nkwëryi ÿal
hu hna.

23 Humpen lampu ÿa bokëdfina pët ÿal hu hna.

Kopa aÿëlah ahasëk gë asëvalu bokëdfena
nkwëryi ÿal hu hna.

Vëÿin fop koyëna nked kabi vēwaf vëlëŵ hu

va yeho vēhnaÿah vēvē nkal va, do kavëla

hu ña tokakëhni fop wayamani ña.

24 Mbëvehnëderu kabi ÿal hu hna tëkatik sat
wakila gë

vēfacah fop, vēle ryawëik nkal li.»

19

Hnëŵ ŵëka ambin

¹ Ga ndëcëk watac, nkwëryëbu had kopa
bulunda samah mbin hna le ryekadëho:

«Aleluya!

Ipeh ña, icëmb iña do gë fanka fa vëhni Wën fu hna nke.

² Vakitiña vantëwu va catëk do toña ye.

Kitiñëka asëval ale yëtanik gwafa ntëwu,

ale ronkëñëdëho nkal gë gwafa ntëwu,

koroteyehnëhnëka soñe sat vëryokuñ vëlëwu va.»

³ Mbok nësëni kat:

«Aleluya! Hwëcic hwëdëh hunte mbëvahnëd Babilon Samah ña kayëndaf dol do gë kantëm!»

⁴ Tac vacërakëlo wafëhw wahi gë vëhnah (24)

do wulaw̃ wahnah (4) w̃a ndëkwëhnëniho,

cëmbëniha Wënu ña ga ntañak tinki ahnaw̃ hna

nësatëndëni: «Nke koyëna! Aleluya!»

⁵ Tac cahnik kopa mbë tinki ahnaw̃ hna ntehn:

«Cëmbëryina Wën fu ña, w̃uhnë fop vëryokuñ lëwu,

w̃uhnë, vëhinhah gë vëryindah, vële ntakëd g'umë!»

⁶ Do nkwëryëbu had kopa bulunda yabah,

had kopa wavonkëlo wënka wacankaf, do had

wakopa waparaf, nësatëndëni:

«Aleluya! Ahwëhn Wën fu ña Ahwëhn Fanka

Fop ÿa

tufahnëk inaw̃ ntëwu ña.

⁷ Natëfu, nëñëfu,

cëmbënëfuna kabi ambënt ñël Fape fa tëkik,

do ale tëhna a këbënak.

⁸ Mawëryahnik cudä viyi vihinhah vëfëtëpët

do vëfacah, viyi vihinhah vi ye vantiyehn vacatah mba vëfacah.»

⁹ Mëleka ŷa më ntehnëko: «Kerëry: Mbetani vële wacik hnë mbënt Fape fa!» Më mbok ntehnëko: «Wani ye wanës paryi Wënu ŋa.»

¹⁰ Tac ndëkwëhnëbu hnë wapary mëleka hna sëmbahnëwa, bare umë ntehnëko: «Kehary antë ali wani! Ami ye arëfëlënta hun ŷa doku hna, wëjë gë vëŷënta hu, vële ye wasede Yesu. Ha, fop wante pëyahnëdëni wakila ŋa, wëba Yesu ye had gante tufëkëhni Iyir Wën ka. Awa cëmbëryehna Wënu ŋa fo!»

Soŋe viŷë mbëd gë wahi vile ryëcëtaɖ

1. Soŋe ale hayëka pahnac yah

¹¹ Tac nubu ambin ŋa pidëtak do wëlinëha pahnac yah. Ale hayëka ŷa wacëde Ahahnëndak do Toña. Kitiŋëɖ do mëtaryëɖ g'usatah. ¹² Vinkër vidëwu va nkeho had humpen hwëdëh; pënkwo vapënkwo ahnaŵ; akwëhnako wac ile herik hnë mbahn dëwu hna do wok yëtina afo umë. ¹³ Acudako cud nte hoyik hnë sat. Wacik: «Wanës Wën». ¹⁴ Wasodafe wavë ambin tëfalëdënihaŵo hnë wafahnac wayah, vëhni fop viŷë vëyah do vëfacah cudaniho. ¹⁵ Hnë wës lëwu hna canëdëho sëlame ŷakah soŋe ndafahnëhni wayal wã. Keryëdëhëhni gë ryoko ryëhwëra, ŋwëyëhnëɖ waresen hnë tank camah ntavah mba Wën Hwëhn Fanka Fop. ¹⁶ Hnë cud ntëwu hna do hnë mbuf ntëwu hna kerik wac: «Ahnaŵ vëhnaŵ do Ahwëhn vëhwëhn».

2. Ambënt Wën soŋe wasëry

¹⁷ Tac nubuha mëleka ryampo ga kahnëk lav hna. Ndekahnëkëhni gë kopa sankaf fop wasëry

wale watëf cëmët ambin hna: «Yijën, barëpëlin soñe ambënt cankañ mba Wën, ¹⁸ soñe aroku mbahn vëhnañ, mbahn vësankaf wasodafe, mbahn vëhwëhn fanka, mbahn wafahnac do gë vële hayëkëhni va, mbahn fop vële ye vëramp gë vële wok vëyena vëramp, vëhinhah gë vëryëndah.»

3. Soñe ntañ ña gë kila wamër

¹⁹ Do nubuha ntañ ña, vëhnañ vëvë nkal va gë wasodafe walëw hni. Mbarëpëlini mëtaryëniha ale hayëka pahnac yah ña gë wasodafe walëwu ña. ²⁰ Pëlanaha ntañ ña gë kila lëwu ña vële liko haryënkwa lëwu vifëmpëhnhah wante tokahnëkëhniwo vële hwëhnhak yavëta ntañ ña do sëmbëdëho wëntëlënta lëwu. Fop vëhni vëhi tak ntonjini vëfëren fo hnë lant hwëdëh hn'ile ñagëd uvëd. ²¹ Vëyëntañ va fop mbëvëni gë sëlame le sanidëho hnë wës ale hayëka pahnac ña, do fop wasëry ña pihñëniho vimbahn vidëw hni va.

20

Wabëhn wuli

4. Soñe pëla Sintani

¹ Tac, nubuha mëleka ryampo ga cëlid g'ambin. Amënkwëko hnë vák lëwu hna sëdëta hatëh hatëwah gë vankëncä vantënah. ² Më pëlaka fato fa, lën sër ile ye yine do Sintani, do ñaba soñe wabëhn wuli. ³ Më ntabëka hnë hatëh hatëwah, pidëk gë sëdëta hatëh ha, g'antë mbok tokahni wayal ña, hafo pad wabëhn wuli ña. Ge ndëcëk watac, tëfëka tavi soñe toyë fo.

⁴ Do nubu watinki vëhnaŵ. Vële yijëd ntañani va, njëdayini fanka kitiñahnëni. Nubu fëna wayiry vële lëpëtik vankaf va soje ucedeya ntëŵ hni wëba Yesu do wanës Wën, do fop vële wok vësëmbëlahna ntaŵ ña g'ile wëntëlëk g'umë do wok vëhwëhnana yavëta lëŵu yëka lëŵ hni hna ma vák lëŵ hni hna. Mbokajëniho hnë uwám hna do naŵëniho gë Këris ÿa hafo wabëhn wuli. ⁵ Umë ye ibëhn ndënkwerÿënkwa ña. Vësëm vëÿëntaŵ va vëvokajëna hnë uwám hna ani gë padahn wabëhn wuli ña. ⁶ Mbetani do vëÿahnik Wën nkeni vële yentahnik hn'ibëhn ndënkwerÿënkwa hna. Hnë vëhni icëm kigëna ña kwëhnana fanka; vëhni yed vësëna vëva Wën do gë Këris ÿa, do naŵëdëni g'umë wati wabëhn wuli ñi.

5. Soje itav Sintani

⁷ Wati nte padëd wabëhn wuli ña, Sintani ÿa tavëde gë kaso lëŵu, ⁸ do njid tokahni wayal, wale wacik Gog gë Magog, hnë vacape vanah hnë duniÿa li. Umë varëpëdëhëhni soje wët: iyab ntëŵ hni ña nke had nkërëyal mbë wov. ⁹ Më campëni duniÿa li fop do kwërëlehnëni sary vëfacah, nkol nte ñahnëk d'us Wënu ña. Bare cëliko ambin hna hwëdëh mbëvehnëlehnëhni fop. ¹⁰ Do Sintani ile rokadëhëhniŵo ÿa, ntabiko hnë lant hwëdëh gë vëd le fëdëd, d'arël ntaŵ ña gë kila wamër. Korotëdëni d'us g'anent gë g'umëd soje kantëm.

6. Soje ikitiñ

11 Tac nuɓu tinki yah sankaf ahnaŵ a do ale lañak. Haryënkɓ lëŵu nkal ña gë ambin ña nkaryëni hara vëravëna dahëse, 12 do nuɓuhëhni vësëm va, vëryëndah gë vëhinhah, kahnëni haryënkɓ tinki hna, do vakayëte va pidëtiko. Kayëte kawary fëna pidëtiko: kayëte uwám ŵa, do vësëm va kitiñiniho gante ntiniho ka, gante kerik hnë kayëte ka. 13 Wov ÿa mbësahnëkëhni vësëm vëlëŵu va, icëm ña gë ÿëŵa vësëm ÿa mbësahnëkëhni vësëm vëlëŵu va, do ale-wo-ale kitiñiko gante ntiko ka. 14 Tac icëm ña do ÿëŵa vësëm ÿa ntonjiko hnë lant hwëdëh hna. Lant hwëdëh ye icëm kigëna ña! 15 Do ale-wo-le woko kerina hnë kayëte uwám hna ntonjiko hnë lant hwëdëh hna.

21

7. Soje ambin kasëk gë nkal kasëk

1 Tac nuɓu ambin kasëk do gë nkal kasëk. Ambin ndënkɓwëryënkɓ ña do g'inkal ndënkɓwëryënkɓ ña nambiko, do wov ÿa golohna. 2 Do nuɓu ga cëlëd hnë ambin hna, ðarël Wën hna, nkol pacah, Yerusalem kasëk, had asëval ale hëbënak soje asanu fac ñël hna. 3 Do nkɓwëryëbu kopa sankaf le ŵatik tinki ahnaŵ ntehnatënd: «Yëkëry: idëd Wënu ña gë vahnë va nke. Antëdëd gë vëhni, ankedëni bulunda lëŵu. Umë dënk gë vëhni nked, Wën hudëŵ hni yed. 4 Apëhwëcëdëhëhni fop wagwën vinkër vidëŵ hni hna. Cëm ña godina, ma usay, ma wako, ma horot; ðuniÿa sër ÿa nambik.»

⁵ Ale lañak tinki ahnaŵ hna ntehnëk: «Wëlin g'antidëfu fop viyë vēhasëk.» Do mbok ntehn: «Kerëry: Waŋi wanës ye wante hode kwëtahni do ye toña.» ⁶ Do mbok ntehno: «Antiyak. Ami ye Alëfa gë Omega, Wapëgwala do gë Wapuyala. Ale njok wënka njëdädëfuha aki fo hayalin wënka uwám. ⁷ Ale wëkëk a nuŷad intëw, nkedëfu Wën hudëwu do umë yed fatah mën. ⁸ Bare soŋe vēhëmak va, vēle wok vēhahnëndana va, vēwëh va, vēryaŵ vahnë va, vēle wafad va, vēhav va, vēle yëfad wasank va, do fop vēwër va, sah lëw hni ŷa hnë lant le hëvëd hwëdëh nke; umë ye icëm kigëna ŋa.»

Soŋe Yerusalem hasëk

⁹ Tac aryampo hnë wamëleka mbëd gë vēhi hna ale wënkëko vañërya mbëd gë vaki va tēmpah wëkata mbëd gë waki ŋa njijëk do ntehnëko: «Yij, tufëdëmina ale hwëhnik a, ale ñëlëd Fape fa.»

¹⁰ Awa, Iyir Ipacah ŋa njijëk hnë ŷal mën do njoko yaŋ hnë kuŋ cankaf, do tufëko Yerusalem, nkol pacah ŋa, nte sëlid ambin darël Wën hna. ¹¹ Pëtëdëho gë icëmb Wënu ŋa. Mpen ntëwu ŋa mëntëlëko gë taka dakëlah, had taka nte ravëd nuyi kamëhni lëwu ŷa. ¹² Akwëhnako kece ryindah do hnaŷah. Kwëhnako warënka pëhw gë wahi (12) do haryënk wë rënka-wo nkeho mëleka ryampo do hnë rënka-wo keriko uŵac: uŵac wahnënk pëhw gë wahi (12) vutah Isërayel va. ¹³ Nkeho gë pëhna lav warënka warar, gë farëhw warënka warar, gë farahahn warënka warar, gë njoya lav warënka warar. ¹⁴ Kece

vankol ÿa njëryiko hnë wëraka pëhw gë wahi (12) do hnë itaka-wo keriko uŵac vēfayik pëhw gë wahi (12) Fape fa.

¹⁵ Mëleka le hnësëhnëdëho ÿa mënkwëko ÿëña sanu soñe ñañahn nkol ña, warënka ŵa do gë kece lëŵu ÿa. ¹⁶ Nkol ña këñëlahnëko vacape vi fop: yary ña këñëlahnëko gë yank ña. Añañëko gë ÿëña ile mënkwëko ÿa, ndëkwëk waÿëña wawuli pëhw gë wahi (12,000). Yary ña, yank ña do gë yihn ña këñëlahnëko. ¹⁷ Ñañëk kece ÿa, ndëkwëk waÿëña keme gë wafëhw wahnah gë wahnah (144), ÿëña vahnë mbalëtahnedëho. ¹⁸ Kece nkol ña njëryiko gë wëraka walakëlah waryunënkah do nkol ña nkeho sanu facah fo ile ŵëntëlëk gë sëleku facah. ¹⁹ Hnë wëraka wale njëryahniko kece vē nkol ÿa nkeho fop wasifa wëraka walakëlah. Taka dakëlah ndënkwëryënkwa ña yasëp yeho, kigëna ña safir, tarëna ña nkeho kalësedëwan, nahëna ña emërod, ²⁰ bëryëna ña sarëdëwan, kwëhn mbëd' g'iryawŵ ña wakorënalin, kwëhn mbëd' gë wahi ña wakërisolit, kwëhn mbëd' gë warar ña waberil, kwëhn mbëd' gë wahnah ña watopas, kwëhn pëhw ña kërisopëras, kwëhn pëhw gë ryampo ña iyasent, kwëhn pëhw gë wahi ña ametisët. ²¹ Warënka pëhw gë wahi (12) ŵa yeho wanjere pëhw gë wahi (12). Rënka-wo uyere ryampo fo ye. Do ankaŵ hnëm mbë nkol ña nkeho sanu facah had sëleku lancah ile ravëd nuyi hamëhni lëŵu.

²² Bare Cery Wën Cankaf gelohna hnë nkol tac kabi Ahwëhn a Wën Hwëhn Fanka Fop fa ye Cery

tac, ndampo fo gë Fape fa. ²³ Nkol ña balëlahna lav ma lepera soje penënda, kabi idanc Wënu ña penëka, do Fape fa humpen hudëwu ha ye. ²⁴ Wabulunda njasëdëni hnë mpen ntëwu hna, do vëhnañ vëvë nkal va njojëdëni wahnapul walëw hni wã. ²⁵ Warënkã walëwu wã bokëdina pida kabi umëd ña bokëdina nke. ²⁶ Njojëde hnapul gë untënah wabulunda ña. ²⁷ Ñoñ ile wok pacëna bokëdina tënk hnë nkol tac, lakënde vële lid ile wok catëna ÿa do vëwër va; vële herik wãc hnë kayëte uwám mba Fape fa fo rënkëd.

22

¹ Tac, mëleka ÿa tufëko garyëla sankaf wënkã uwám wã ile yalidëho hnë tinki Wën hna do Fape hna, pëtatënd had sëleku. ² Fagant ÿëwã vë nkol ÿa do cant garyëla hna nke atëh uwám nte lëwëd wahwënta pëhw gë wahi (12) bëhn hna. Lepera-wo-lepera antëwëd, do yaryef lëwu ÿa njehnahnëdëniho wabulunda ña. ³ Ntavah Wënu ña njamënik, kata godina. Tinki Wënu ña do gë Fape fa yed nkol hna, do vëryokuñëhn Wën va ndokuñëhnëdëniha g'icëmb. ⁴ Anudëni yëka lëwu ÿa do wãc lëwu ÿa nkef hnë ÿëw lëw hni hna. ⁵ Bokëdina nke umëd, vahnë va vëvokëdina mbalëhni humpen lampu, ma humpen lav, kabi Ahwëhn Wënu ña campehnëhnëdëhëhni humpen hudëwu ha, do nawëdëni kantëm.

⁶ Tac mëleka mbok nteho: «Wañi wanës ye wante hode kwëtahni do ye toña. Ahwëhn a, Wën wahakili wakila, payika mëleka lëwu

ÿa tufëhni vëryokun vëlëwu va ile rëfëka tëki biyëdina.»

⁷ Yesu më ntehnëk: «Njijëdëfu biyëdina. Mbetak ale wawëhnëk wanës Wënu ña wante ye kayëte li.»

⁸ Ami, San, nkwëryëbu do nubu watac. Ante nkwëryëbuhu do nubuhu ña, ndëkwëhnëbuhu wapary mëleka le rufahnëdëho watac ña, sëmbahnëwa. ⁹ Bare ntehnëko: «Antë ali waji! Arëfëlënta hu doku hna yebu, gë wëjë do gë vëyënta hu wakila ña, do gë vële hwëtaɗ wanës wade herik kayëte hna. Wënu ña fo rëfëka asëmbënd.»

¹⁰ Mbok ntehno: «Antë asowëhni vahnë va wanës wante ye kayëte li, kabi wati le hahnëndik soje vëyin va tëhajëk. ¹¹ Ale rumpak a nko ntind watumpak, ale wok pacëna ÿa nkonti hnë ronkah hna, bare asatah a nko ntind usatah do afacah a pacëna kat.»

¹² «Wëli, njijëdëfu biyëdina. Njonëhnëdëfuha ami dënk ale-wo-le ile rëfëka nuÿa ÿa, vësaÿa gante ntik ka. ¹³ Ami ye Alëfa gë Omega, Aryënkwëryënkwa a gë Arëkwa ÿa, Wapëgwala gë Apuyala ña.

¹⁴ «Mbetani vële ryagëɗ vacud vantëw hni: tënkëdëni gë warënka vë nkol wã do tokëdëni atëh uwám wã. ¹⁵ G'ipër nkeni wabe ña do gë vëhav va, vile wafad do vëryaÿ, vële sëmbëɗ wamën wamër, ale-wo-le ÿahnëk ma liɗ wamër!

¹⁶ «Ami, Yesu, payëbuha mëleka mën ÿa njonëhniwu inɗi cedëya soje vacery sali. Ami ye hnënk David, ikol nte fëtëɗ nkëhnëfacëɗ a.»

¹⁷ Iyir ña gë aÿëlik a nësëni: «Yij!» Ale-wo-le wëryëk ÿa nës: «Yij!» Ale-wo-le njok wënka ña njij. Ale-wo-le ÿad wënka uwám ña, njij centi aki fo. ¹⁸ Ale-wo-le wëryëk wanës wante kerehnëko Wënu ña hn'ani kayëte, paryi pëyadëmu: ge ahnë nkwënëk iñë, Wënu ña nkwënëhnëdëha wakata wante herik hnë kayëte tac. ¹⁹ Do ge ahnë ñayëtëk wanës inji kayëte, Wënu ña ñwanjëdëha sah lëwü ÿa hnë atëh uwám do hnë nkol pacah hna.

²⁰ Yesu pëyahnëk waji fop toña ye do ntehn: «Ha, nijjëdëfu biÿëdëna.» Nke koyëna. Yij, Ahwëhn Yesu!

²¹ Arabi ipërëna Ahwëhn a Yesu nke gë wühnë fop!

**Vikerëh Vikasëk Wën gë Wapëgwala
Wamey: Vikerëh Vikasëk Wën gë Wapëgwala (New
Testament+)**

copyright © 2018 Wycliffe Bible Translators, Inc.

Language: (Wamey)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022
f961026b-f72f-5bd7-9f75-efa7f932577e